

聽

雨

樓

隨

筆

聽雨樓隨筆卷六

章山甫藩浙江歸安人署梁山丞

飛奚辭鶴俸微官貧僮僕怨地僻友朋希自問窮堪固謀  
生計已非難攜兒女去欲別又牽衣貧官之况可想在任  
冷署無事吏民以子弟來學無敲朴有絃誦焉視峨松者  
更忙也又夜泊重慶遇驛漲詩云夜半吼江濤蛟龍怒氣  
豪命原爭一刻痕已沒三篙水滂舟相觸風狂浪益高灘  
聲人語雜出險首重搔寫恐怖狀如見

嚴夢琴麗正嘗與同人爲消寒會分咏平臺梅花云梁園

舊蹟已湮淪別爲癯仙築水濱百仞風寒吹縞袂九華雪  
冷墮香塵誰登白玉尋高士合置黃金召美人好似吾家  
垂釣處一竿烟月一江春

趙桂生吳江人號竹菴以諸生援例來川候補少時著蘭  
堅閣叢藁小賦取法齊梁有榆關話別圖萬里長風入峽  
圖題咏甚多每隨學使幕中衡文足跡徧東西兩川性耽  
吟咏佳篇不勝錄自郵寄示絕句三首云問古尋幽石徑  
前子雲樓閣感風煙我來春水桃花裡鄆酒馨香拜杜鵑  
梅子成陰綠漸黃平疇一望水雲鄉桐花開遍鵝溪道不  
見重來小鳳皇竹栢森森別院開晚風吹袖復登臺鄆筒

池繞郭筒井宜向冰壺濯魄來又工作小詞錄其戲題吸  
鴉片煙便面以雅詞寫俗事婉妙入情湘管銜來一片燈  
光微颺溯風味海舶獨絕雲蒸霧釀續命膏浮銀盒內返  
魂香剔牙籤上看氤氳一縷透心窩通身暢珠簾捲微雲  
漾冰筆清濃煙蕩更玉人偎處髻花初放妙藥已將凡骨  
換丹成一任情波漲一呼一吸駐春光春無恙窗外何人  
知使者噓而來矣笑雜沓雌雄鬼臘尙貪餘味冷月不遮  
枯骨瘦腥風慘帶幽蘭氣嗅甜香都是過來人餒魂起相  
思枕爲君倚同心匣爲君啓是一般纏緜一般快意燈下  
弓鞋如玉軟床頭鬼手如麻細舞青燐知己又相逢真歡

喜

黃湛華江蘇上元人號嶺樵際飛先生之後工彈琴家藏  
連珠琴琴池中刻文文山製誠意伯劉基修云得於燕市  
真贗莫辨也有哭妹五古一首情事絮絮嗚咽淋漓自真  
情流出故不可及有黃茅岡風雪運糧圖多題之者咏秋  
草四首云曾憶東風襯麴塵榮枯偶一續前因漫憐階砌  
蛩吟露轉見池塘客詠春周道靡蕪懷故國半江蘆荻悵  
歸人荷鋤翻怪園丁懶雨溼苔荒滿四隣平沙雁落楚天  
空爪跡微茫印處同湖外黃疎鷗夢裏堤邊碧老馬蹄中  
芊眠幾日來遊屐萎絕經時怨晚風沉芷澧蘭無限意至

今埋沒幾多叢家在莫愁湖水邊  
燒痕寒潦六朝烟故宮  
零落畱遺蹟舊苑蕭條憶昔年  
白露關情誰更護西風滿  
目總堪憐何當歸去葺茅屋  
把酒東籬九月天清涼况味  
掩重門山色闌珊護遠村  
料得王孫傷舊夢莫教騷客斷  
羈魂一庭葉落人增感  
三徑霜銷月有痕  
佇俟東皇迴馭  
日平原小草亦銜恩  
現任慶符縣典史

吳嘯雲爲楫浙江錢塘人需次在川  
詩筆娟秀與同人分  
題晚香玉云惜花心事付花知  
人立黃昏爾許時日暮阿  
香纔喚起風流小玉故來遲  
瘦於白鶴摹身段笑與金萱  
作女兒一搦纖腰向懷抱  
倩魂無着月離離夜來香云香

痕低映碧紗，懶隔葉窺來。淡欲無萼綠，華經前度瘦。薛靈  
芸換小名呼，葳蕤密蕊黃。昏破宛轉柔，條紫竹扶笑。指昨  
宵清夢好，翠翹斜壓鬢雲酥。

周捷亭聯科以拔貢捐佐貳來川候補好爲詩有集一卷  
往廣東投効軍營以知縣陞用竟歿於粵在蜀曾錄詩遠  
寄榮昌乃檢篋中錄其七絕三首不忘故人惓惓之意巴  
江海棠溪道上云層疊溪田鏡半奩緒風溼冽雨廉纖寒  
來陡覺征衣溼貪看山光未放簾冷水關卽景云石磴迴  
環面面風濤聲雲影畫難工山深畢竟無凡境萬壑松遮  
一樹楓天竹云

自註彭山  
天竹最多

青鳥啣餘火齊珠如何拋擲徧

山隅水仙香冷梅花瘦辜負金閨集艷圖自註云東征小  
草幾四十餘首途次匆匆不及結清草此奉寄

燕會閒周支山岐源出圖章示客上銳下圓形質古雅刻  
斗酒百篇旁有記字細如髮櫟園先生舊物也支山爲先  
生八世孫先生曾官山左觀察青州吾淄蒲柳泉所稱折  
獄如神者凍腦犀玉諸圖章不下十數函一姬掌之善爲  
位置後皆失去獨此猶畱奕世可寶也支山少年英俊以  
佐貳需次在川馳逐名場詩多可採浣花修禊云錦城春  
景雲如委錦江春色花如綺尋春不作冶春詞蘭亭韻事  
誰堪擬少陵已死草堂存松竹城南舊詩壘一叢香草綠



迎人門前曲曲桃花水金陵詞客涪翁裔勝日招遊集知  
已鶯花春暖百忙中琴劍人來三徑裏韶光九十賦遨頭  
豈因微逐誇綺靡須知古不異於今一詠一觴良有以倚  
欄好証素心同落花水面波紋起

建昌一帶苗婦冬月相率來成都爲有力者傭工其人粗  
蠢耐辛苦呼爲二姐子春深卽去畏熱故來往不憚煩咏  
之云蓬頭赤脚短衣單執爨攜瓶未覺難自笑此身如旅  
雁冬來春去不遑安錦官城裏閱繁華籬下依人那是家  
冷眼偏知憐熱客紅塵滾滾走如麻

巴渝閒有女三五成羣散入成都屬邑聞人家慶賀則往

歌舞侑酒名曰楊花孫瘦石詩云雲英姊妹最輕盈金管  
紅牙雜玉笙一樣因風同起舞浮萍容易著他生十里青  
帘水一方春衫飄拂酒人腸憑誰爲寄東風道莫遣楊花  
上下狂

川中各縣道途所遇負炭婦女甚多健者負至百斤往返  
七八十里僅得二三十錢餬口還將負重向人誇一日勤  
勞米可賒自幼不知脂粉貴煤灰滿面似塗鴉依然閨闈  
女兒身日走長途耐苦辛冷竈自憐烟火斷雪中煤炭送  
何人

川中無業貧婦每割青草鬻之爲人飼猪第田各有畔越

界以取必受笞腰鎌陌上綠盈盈織芥還愁起鬥爭但得  
農人皆讓畔何年芳草不叢生零露無聲淫敝襦此來專  
供牧猪奴旁人錯道踏青去可有閒情鬥草無

少陵有咏負鹽女悲其登頓之苦也今犍爲河干婦女負  
鹽于船爲人作工覓錢以食肩挑背負一身兼雜作丁男  
也不嫌浹背汗流形質陋旁觀休得笑無鹽豐韻云辛苦  
酸醜眾味兼以身嘗試又何嫌寒風刺面衣裳薄怕唱新

詞刮骨鹽

蜀中產茶除蒙頂入貢外出關入藏者隻有定額商賈輻  
輳打箭爐產茶之地不一嘉定屬洪雅夾江峩肩爲多洪

雅茶湯黃味甘戩眉茶湯清味苦每春婦女入山採茶鄰  
家姊妹共爭先好趁春風穀雨前藍布包頭篋繫背新芽  
摘帶露華鮮穿林曲徑入烟蘿較取柔桑吃力多大小龍  
團渾不識歸家學得採茶歌

蜀地紅花販入四方者較他省爲佳內江縣產尤多栽花  
滿縣樂融融也與三農播穀同那用燕脂山下去夕陽村  
外遍山紅女伴攜來每兩三此閒風物似江南誰言婦女  
無顏色採得紅花勝採藍

陳仙裳雲錦浙江人需次在川有合德玉印漢尺徑九分  
高五分白玉鳳紐文曰繞好妾趙陸敏齋爲作詩云漢宮

春盡不知愁鳳紐依然手澤畱玩好至今猶細膩摩挲少  
許也溫柔仙裙有姊新承寵紈扇何人自感秋笑寫蠅頭  
紅押尾石華廣袖擅風流昔山左朱青雷得文君私印與  
此可稱合璧閱芙蓉山館詩載馬湘蘭小印上刻浮生半  
日閒五字旁有欸識爲董香光藍田叔諸公社集西湖何  
雪漁爲湘蘭作羅雨峯爲繪橫卷以張之楊蓉裳爲作七  
古長篇視此殆不足數矣縷不作  
媿未詳

榮昌敖廉臣號讓泉往黔得資助銀八百將入京捐教職  
江中船壞行李盡入洪濤一童溺焉遇救登岸至襄陽城  
外堤上遇一叟坐而招手云死氣滿面何以至此令開生

辰看畢曰賴祖宗陰德曾救一人之命可免然亦須破千金問金失何所曰失於水遂以船破事告之曰幸哉若非此厄陸路定遭強劫命亦危矣予之錢不受讓泉初娶伉儷甚篤妻早卒有落花如夢圖爲題詩云美人應是百花魂百花卽是美人影百花搖蕩春風中春風一度誰猛省畫閣晝閒罷吹簫碧紗窗掩香風飄飛花萬點落紅雨無限韶光夢裏銷蓬山命駕難畱住但見斜陽滿芳樹柳顰黛睡共含愁香魂迷却來時路杜鵑啼處草不芳惜花御史悽斷腸春鳥不來無信使蝴蝶飛去剩荒涼翩然九霄降彩鳳夢中相逢堪一痛是真是幻費叅詳回首桃花滿

玉洞

大足令彭海樓旭初每年元旦試筆必有詩歲成詩一冊  
集已盈尺矣曾索某姬人書因畫紅白梅報之兼題二絕  
某和其韻用姑射小姑二事爲海樓書扇未幾海樓亦納  
寵余沿其意爲詩贈海樓云羅浮夢裏遇明粧月落參橫  
墮渺茫何似銷魂蓉帳底小姑今日嫁彭郎梅花修到世  
閒無淡白嫣紅入畫圖果是神山仙子降昨宵親看雪肌  
膚海樓前以艱歸今補南溪令

成都水利同知強君望泰故河南滑縣令諡忠節公之次  
子也兄逢泰婦徐氏遇變時刀斃一賊大鏡擊斃一賊李

文成入又誑與密語以簪刺其耳賊恨甚釘手足於柱鬻  
割之謚節烈封恭人問司馬司馬不能知張鐵香曾記之  
余爲作明鏡辭明鏡光皎皎照見妾顏色但叱貌如花誰  
知心似石門內黽勉事舅姑門外喧呼驚有賊胥役皆劍  
戈死生爭頃刻吁嗟乎紅顏嬌無力明鏡明鏡汝照我容  
顏願照我胸臆我不能疆場馳怒馬握戈戟我將持汝奮  
力擊一賊昂然入身匿屏後賊不測鏡光閃爍如飛電血  
肉亂飛拚一擲一賊既踣一賊繼舉鏡照膽賊奪魄吁嗟  
乎紅顏嬌無力勇實百夫特弱者投繯怯者污若箇婦女  
敢拒格人生拚死非甚難所貴臨危不惶迫賊忿真切齒



恨不卽寸磔手足釘門三日死生氣勃勃怒容赫阿夫不  
在室阿翁死報國妾如明鏡圓不缺心如明鏡光四塞世  
閒丈夫愧冠幘

中江李崧霖原名特壽字夢蓮號簫樓幼倜儻不羈博極  
羣書才思過人每試展卷立就冠其曹偶歷任學使稱爲  
天才芸浦趙佩湘倍加器重有玉堂金馬之目詞賦詩文  
爭相傳工書善畫嘉慶丙子舉人著有三十樹梅花書屋  
集極爲弓菱溪刺史所賞其詩大都喜馳騁好使議論微  
有努力貪多之病要其超出庸俗不可沒也壯年殂謝有  
子作鴉片烟詩云茶神酒仙呼不起三千年後出烟鬼烟

鬼燒烟如燒丹一日無丹鬼亦死又云曲室窈窕燈如豆  
簾幕低垂人影瘦結云從來燒丹學神仙未見神仙食烟  
火達子營途中遇雨云黑雲奔走如馬牛樹聲萬壑風颭  
颭雨師未到先作勢斷截行人來馬頭山後山前無館驛  
陰巖鬼嘯晝昏黑僕夫倉皇動愁色欲行不敢止不得須  
臾飛雨來懸溜滿山口頃刻羊腸路烏有老蛟跳怒惡風  
吼只恐人馬同時飛上天要挾風雷天上走拚身迸力十  
里行遙望村庄投欲爭有如孤軍隘要冒鋒鏑得倚破壘  
如長城吁嗟乎我行天下幾萬里行路之難未如此僮僕  
嗷嗷怒不已我對一樽大喜君不見北方平地無冬水

一寸麥苗乾欲死

江太史國霖號小帆大竹人道光戊戌探花少年受知于  
吾東孫東岳太守同邑王大令魯之甥也魯之兄弟以詩  
名太史學有淵源天才亮拔舟車所至郵亭祠壁揮筆畱  
題人爭傳誦夔州懷古萬山如璩擁夔門曾護高光舊子  
孫空仗老臣麾節鉞恨無餘力挽乾坤雲收八陣銷王氣  
浪湧三巴洗淚痕莫向永安宮外望滿江風雪易黃昏八  
里橋關壯繆廟在許州城外干戈滿眼陣如雲匹馬勞勞問使  
君封盡黃金拋却印教人知是漢將軍早發靈寶過函谷  
關馬蹄濺水聽潺湲驛火遙遙見故關一片荒雞啼北郭

四更殘月在西山亂峯回合天光小古堞參差石氣頑夜  
半今無偷渡客田文去後少防閑風雲疊疊鬱嵯峨戰格  
排空轉眼過馬首東來開紫氣虎牢西向捲黃河關山誰  
設三秦險戈甲曾摧六國多近日丸泥俱不用玉門聞已  
唱鏡歌

車錫侯邀與錦堂雲樵共飲錫侯自述宿山家詩云風色  
入墟烟蕭颯送秋爽開門孤月明但聞山泉響又七絕云  
桂楫蘭橈欸乃歌望郎不見離情多妾心一似長江水潮  
去潮來柰爾何錫侯名申田山東海陽人己丑進士補定  
遠縣知縣調宜賓豫工例捐陞員外

南溪令黃懋祺號巽甫學問淹雅嘗代題鹽茶道署廳事  
聯云鎮日得長閒最有味時如水淡此官無別趣却宜多  
處是詩清切鹽茶蘊藉高雅惜未刻而懋之劉玉坡先生  
將於燕魯公所樓上作楹聯所擬皆不當意巽甫題云曲  
應天上有人是日邊多深賞之以爲確當今節相藏山先  
生建武廟楹聯亦其所擬嘗竊擬一聯質之巽甫云正氣  
嘗伸剛大塞乎天地聖人復起忠義本於春秋亦爲所許  
王春綬觀察陞山東都轉巽甫代鰲石先生作詞送之先  
生云皆吾意中所欲言竟寫得出詞云回首前塵濟水城  
南是吾舊遊想趵突泉邊苔痕尚在鵲華山外月色仍留

一晌升沉幾年飄瞥贏得蕭蕭雪滿頭君到後問棲岩千  
佛還憶吾不那堪重話前修是十載曹司共唱酬更濯錦  
江邊團樂畫卷散花樓畔狼籍觥籌我正欲歸君偏先去  
從此天涯兩地悠相逢處有家園水竹待駐牙驄

顧鳳藻號梧生長洲人署溫江令有雙桐書屋圖少年讀  
書處也爲題七言長句同人亦多題咏梧生和章山甫梅  
花雜咏憶梅云春風小別又年年何處重逢編袂仙月影  
三更添好夢香魂一縷繞寒煙相思只自尋籬落消息還  
應問水邊翠羽啾嘈但惆悵幾生修到悟前緣探梅云寂  
寞疎籬興不賒香心淺逗水之涯春光報道林梢到疎影

先看竹外斜踏雪且從橋畔覓尋芳不礙樹枝遮空山斷  
岸無人過中有荒寒處士家

劉肇宴號曉巖中江拔貢生少年有雋才畫花卉疎縱饒  
逸致詩筆奇肆以耽於色得咯血疾卒未見其止可惜也  
爲黃梅樵題風雪運糧圖云奇峯插天寒雲裂玉龍橫堆  
千丈雪層冰塞路朔風號裸夷恃險逞詭譎天討皇皇張  
六師貔貅一掃黨羽滅士卒長驅入不毛萬里深虞餓饑  
缺梅樵勒馬膽氣豪越山轉運忘險絕蠻烟四塞征途迷  
性命幾難逃虎穴深泥滑催運難迅速兼程眾心悅危  
難至此見孤忠圖畫聊爲寫英烈吁嗟乎男兒讀書重經

綸文章報國非豪傑眼前得失俱雲烟臣心自信堅如鐵  
君不見馬革裹屍古英雄腐儒聞之都咋舌

荔支榮縣威遠皆有之今無惟合江及九姓土司尚存嘉  
定府署中樹最大亦化劫灰樂山縣荔支灣一株最奇左  
邊結子則右空右邊結子則左空每年互易不爽飽啖紅  
荔色香新入蜀方知味絕倫却怪東坡貪口腹何須願作  
嶺南人半邊多子半邊無本是同根氣忽殊待得盈虛原  
遞代始知天運不偏枯

蠟白蟲種出寧遠生女貞樹初生如赤小豆流涎味甚甘  
涎收則成蟲細若沙點蠕蠕然以立夏節摘收見熱即走



初出者謂之荒沙用嫩岡桐葉裹置蠟樹其蟲卽出先藏  
葉底生白霉數日白去蟲土隔年條臚列似針點積久生  
白衣漸厚至七月伐其枝脫下蟲大如芝蔴排若瓠犀以  
竹簽刮取再熬成蠟裁眉青神洪雅夾江多有之化機從  
古妙難名動物還由植物生破殼紛紛千萬點如蠶食葉  
不聞聲疑是雕成白玉脂畫堂銀燭影參差光明大放人  
爭看誰識經營鍊液時

冬蟲夏草冬則蟲夏則草市中所鬻但草耳根似頭末有  
鬚似其尾也何形畢竟是真形爲草爲蟲化未停那似流  
螢終滅沒春風原上不重青居然小草宿根存蠕動還能

返本原自有真機隨變化炎涼總不負天恩

雪蓮生雪中一莖無葉見卽採之不可出語聞人聲  
地中掘深亦不能得產綏靖屯地蓋靈氣所結云一枝瑤  
葢裊寒烟無葉偏呈艷色鮮不向雪中誇獨立誰知火裏  
可栽蓮不出污泥出玉沙冰山雪海降瑤華聞聲入地無  
尋處此是天生解語花

杪樞樹峩眉有之蓋自西域來者雅州象耳岩亦有此花  
明榮經縣令張維斗曾咏之觀其詩似春末開花紅紫淡  
白不一詩云淡白殷紅欹欲扶層層片片醉春醕曼陀吐  
艷雲霞麗優鉢分香夜月鋪好借邊鸞描卉筆巧揮天女

散花圖洛陽金谷饒脂粉誰信楊環塞下酥

木蓮花生峩峩山谷狀似芙蓉香亦類之一云葉似辛彝  
木幹花夏開枝條茂蔚不爲園圃所蒔白樂天云生巴峽  
山谷閒巴民亦呼黃心樹大者高五尺涉冬不凋身如青  
陽有白文葉如桂厚大無脊花如蓮香色艷膩皆同獨房  
葉有異四月初始開自開迨謝僅二十日又畫圖寄元微  
之云花房膩似紅蓮朶艷色鮮如紫牡丹宋濂溪先生巴  
嶽觀木蓮詩有云枝懸縞帶垂金彈瓣落蒼苔墜玉盃又  
似是白花邛僧云花坼時有聲如破竹旣不肯植于園似  
非所重惜未見黃山慈光寺有木蓮花開與水所生無二

乃明神宗太后從海外得來賜栽寺中宇內無兩蜀地所有似不足與抗

張問行伯母病日夕爲鬼擲揄鬼之情狀病者獨能聞聲見形他人則渺然一日問行隨伯父入房間視聞鬼云三元侯來矣速避之病者以告問行眾以爲夢嚙而不之信問行在房半日羣鬼不敢逼視問行退鬼撓之如初病者告之再三乃與伯同臥寢門外羣鬼懾之遂不復爲祟病亦尋愈時問行方獵獵有聲文壇眾以三元相期許久之以明經得三原知縣眾乃知鬼之所謂云

大相嶺卽岬岫九折坂諸葛公征蠻經此因以名焉吾鄉

呂筠莊太守隨軍營登此蒸飯不熟輿夫頭岑岑不敢高  
聲語語則風雹立至疑有怪物潛其間學使吳樹萱大相  
嶺云太陰積霰鍾峨岷凌冰凍結窮岷垠日月蔽虧陰霧  
黑竟使萬古無冬春我行乍與錦城別城南看遍臙脂雪  
春雲如膩春波肥百花吹暖飴簫節到此天地忽閉藏手  
捫星辰寒無光坑谷森邃炫深紫絕巘嶮嶮爭軒昂西南  
屏障界幽阻烏道風雲天尺許盤盤梯磴作螺旋十步九  
顧瘖不語聞根到處聲喧脰懸岷百尺轟奔雷四圍霧瘴  
霽如雨古木雲衣繡作苔山腰稍憩袞袞地冰柱簾端鏗  
忽墜拓窗下瞰小關山白雲漫漫閱空翠拂鞭跨馬越層

巔招搖帝闕來羣仙罡風吹我衣裳冷手蹶步怯扶欲顛  
俄頃翻身入雲裏不信人間竟有此細棧凌兢廿四盤鱗  
鱗板屋炊煙起陳登龍度二十四盤嶺古云蜀道難難於  
上青天吾從蜀道來所見乃不然那知舊黎所有此廿四  
盤崇峰插霄漢削壁立嶄峴互迴鑿崖磴轉上青螺環初  
從山根起十步折一彎陡上陡紆折閒無五步寬譬如香  
篆紋透迤螭虎蟠又如登天梯修綆不可攀行人蟻緣柱  
骯楚行躑躅乍看猿升木失笑魚緣竿驅驢我行邁取徑  
力已殫盤盤爲悉數由末尋其端或云七十折始可登於  
巔或云百又八折折步履艱險途天所設界限分漢番經

營唐節度此地曾籌邊撓功無成功竟以羈縻安後來沿  
故事中外嚴重關茲山成保障藉封一泥丸自從六詔降  
西抵青海灣重譯通貢賦斯道人所便盤折雖云高可作  
平平觀

犍爲令宋錦堂聯云官號親民版圖內與同憂樂登斯堂  
也惻怛哀矜須知巧吏非良吏地稱名郡漢唐來代有英  
賢居此土者磨礪砥礪莫謂今人遜古人新繁鄭方城縣  
門聯云小民持牒而來向隸徒卽先落膽三思何若田廬  
之樂長吏分符以至與老稚無異屬毛一觸輒關夢寐之  
情二堂云環竹爲廬案上亦列圖書卓然四鄉之長栽花

滿縣徑閒更有松菊恬然五斗之官南充任太史瀚題清  
泉寺云水國中孤峯倒影似青螺浮鏡雄劔插空此江山  
天南第一烟霞外萬事忘機但短笛吹雲素琴彈月這漁  
樵海內無雙余嘗擬燕魯公所聯云我輩好機緣歷秦關  
經蜀道彬彬乎朋得西南依然是燕趙慷慨鄒魯文學今  
日良宴會選巴舞嶽飲歌雍雍焉人集少長且共看錦江  
春色玉壘浮雲

劉泰三號硯農合州人博學工詩著有硯農詩草事母盡  
孝主講雲峯書院二十年一夕見梅花命家人具卮酒題  
句云吾生甘寂寞孤館又風烟老病山中臥梅花何燦然



擲筆而逝

郭上玉名銓以字行忠州貢生性狷介教授生徒作絕句書懷云石磴高齋坐點書平居樂與古爲徒人懷奇字休相問吾廬不是子雲廬

獻賊屠蜀有異僧爲賊所獲執縛梁閒繩忽自斷者三賊奇之禮拜而去夜吐火自焚惟存隻履

劉芳皋潛溫江籍居雙流縣九歲入古場題爲競渡起云水底之人呼不起舟中之人何太喜學使吳白華大加賞識曰此子必爲名士拔第一入泮吳壽庭學使決其必達嘉慶丙辰果成進士入詞林改刑曹才極敏捷下筆如風

千言立就里居時他縣來一狂生脾睨一切適逢 萬壽  
縣中結彩棚求芳臯書聯者雲集謂狂生曰吾才短乞君  
分任狂生吮筆起草芳臯隨手書聯頃刻三十餘副狂生  
纔草十餘聯耳乃大歎服赴京畱別四首云東風惜別駐  
江干親友銜杯淚轉瀾去路豈如歸路好中年更比少年  
難三春辜負鶯花約一舸涵容覆載寬拋卻枌榆游賞地  
誰令索米向長安情話纏綿彼此同離懷難挽判西東船  
移春岸桃花水客散散垂揚酒旆風數載家園憐社燕一腔  
心事托征鴻永豐橋畔新鶯囀似惜行蹤類轉蓬自疑鷗  
鷺是前身从與湖山締宿因好趁木蘭船兩槳難拋竹葉

酒千巡也知於世毫無補徒托空言大有人翻羨白蘋洲  
上叟綠楊深處坐垂綸總爲飢驅不自如撩人情緒是鄉  
居貓頭笋發牆邊竹鴨脚葵添雨後蔬千里月明歸夢遠  
五湖人去暮烟虛故園春色誰爲主橙樹成陰好寄書任  
廣西鬱林州刺史乃弟止唐沅理學湛深著有五經恆解  
大洞經註諸書不下十餘種淡于仕宦部銓知縣不就昆  
仲志趣不同如是

縉雲山相思巖產紅豆樹高數丈實如豆色正赤名相思  
子又產相思竹形如桃釵又有相思鳥羽毛綺麗巢竹樹  
閒食宿飛鳴雌雄相應籠其一則一隨之豈山靈孕秀鍾

此情物歎縉雲山畔起重岡紅豆花開葉亦香解識春風  
無限恨相思百斛總難量

思字古韻  
平仄通用

綠染斑痕嬾嬾枝深

宵烟雨淚空垂何來比翼翩翩鳥藉報平安不忍離山在

巴縣

忠孝傳家最爲鄉里增重余署榮昌時聞邑中有明兵部  
侍郎劉時俊墓並故宅基在焉時俊于奢逆據重慶收復  
有功其子泌與妻朱氏皆工詩明亡泌起兵復滇黔官巡  
撫後隨永明走緬至永昌病卒于彌勒寺時我朝定鼎已  
久矣其子善復于康熙二年扶櫬歸里作七古長歌代哭  
嗚咽淋漓可作祭文可作志傳不知是淚是血也天心鼎

革莫非數烈士昧天不復顧忠魂縹緲跨箕尾孤子徒知  
風木慕木欲靜時風尚拂父喪子存惟慟哭九京飲恨莫  
可言今日陳詞應代讞憶昔治平忽變亂四海生靈受塗  
炭中原人矣嘆陸沉僅餘東南山一半大厦既傾木怎支  
滇黔分據自乖違犯關僞秦昧大計致教覆敗奔燕畿燕  
畿人操田父略勝奕了了待時着貔貅百萬盡南侵悍將  
猶囂封賞薄置酒高歌疎外聞長驅如入無人境羽書疊  
雪自黔來大帥昏迷終不憬千里黔疆已他屬癡愚更欲  
鍊奇術四方鐵騎薄滇雲滇雲始見征旗出對壘安龍兵  
乍交棄鼓拋旗解戰袍平日自許裹革士此日陣前風鶴

逃臣主倉皇難守禦蒙塵外國作退避吾父策蹇矢從龍  
道染沉疴願莫遂攀髯不及伏深山望南不禁淚湧泉背  
城有約知難踐丹忱獨戴漢家天飄笠蕭蕭跋涉多郵亭  
處處動悲歌回首山川難指示爲道曾隨翠輦過途中討  
日近昆明氊幃在在聚紅纓極目平原景漸惡耳畔時聞  
笳鼓聲父聞笳鼓益悲憤漢宮今已歸異姓許身殉國恥  
猶生五內分崩病益甚疾在膏肓徒瞑眩起死回生父不  
羨昇疾滇池誰氏依孤臣僑寓彌勒殿經略曾與王父交  
耳目偏知僧舍蕭愨勤醫藥爲調治五倫獨將友誼昭父  
已堅心幸速亡食不殮兮藥不嘗臨終語不及家事南向

衣冠返帝鄉天愁慘兮月光昧雲黶黷兮晝欲晦風慄冽  
兮水波橫烏散亂兮聲難凝造化固將烈士憐孤子身如  
萬仞懸豈惜相從泉壤下獨遺靈櫬賴誰還黔南有母幼  
有弟父子繼亡愈顛顛歸靈教弟責匪輕視息苟存誠可  
愧終天抱恨血繼泣天外白虹應貫日此際蕭寺倍悽愴  
來宵知傍誰家室罪戾子身當寸磔慘哉國亡父當厄萬  
里關山將起行謹向先靈酌醴液經略指  
洪承疇

樂至井市鎮聖燈寺古鐵佛寺也範尊像三不詳時代嘉  
慶五年參贊德繼勇侯追戮教匪至土橋鋪羣盜蜂屯鬪  
持未決突見三丈夫鐵面金光長十尺有倍揮手攫賊拉

摺如磔寇驚北官軍從之所到破碎頃黑人躡虛而飛蓋  
神旗天輝妖亂就殄百靈協期貞符然也侯心異命裨將  
尾及寺不見

峩肩朱世重號石亭八歲入泮下筆千言立就十五歲著  
作盈尺有不可一世之概少年登賢書春闈不第抑鬱滿  
腹好酒耽色遂至雙瞽幽憂咤僚而卒卒時年方二十餘  
耳弓菱溪刺史最愛其才聞其歿急遣人搜其詩文集將  
爲付梓未幾菱溪亦歿宦囊蕭然弓嵩保菱溪長子以進  
士分發江西今歲方補縣缺未知石亭之稿曾帶去否石  
亭未免恃才而狂可惜也



堯濬號溶川溫江人父峻亭茂德爲廣東番禺令歿於官  
囊無餘資有書數千卷載三船歸沉其一於水溶川年方  
十五奮志讀書過目終身不忘每讀一書畢卽售於人讀  
竟書亦鬻盡悉藏腹笥中矣近時蜀中博雅之士推陳卯  
生與溶川耳惜老於歲貢今猶舌耕於外作詩及雜著甚  
多弟東郎題其集云放眼古今小淋漓大筆橫乾坤老秋  
色風雨走灘聲看劒心原壯悲歌氣未平茫茫空四海惟  
有弟知兄

伍燕堂紹曾粵人遊蜀家綦江夙以文學著名道光壬寅  
年八十矣作自壽詩云兩繪流觴曲水圖

癸未寫流觴曲水小照丁酉另

冊作

一故吾相對感今吾遺經盡付桐孫讀強步纜資竹杖

扶垂老又添新歲月健忘難進好工夫笑聽朋輩殷勤問  
問我曾周甲子無燕堂年雖高而見者觀其丰采疑爲五  
六十歲人又句云過去艱難猶歷歷老來情趣總超超守  
拙方知隨處適捫心終覺寡尤難其胸懷超曠而時自檢  
束俱可想見平居課三子俱成立濬祥號瓊甫丙申進士  
輔祥號漢平癸巳進士均現任主事奎祥號偉東己亥孝  
廉

直隸張彩峯爲山西典史告歸子炳以吏目分發來川迎  
養省寓與吾鄉前任金堂令梁石民士俊結姻暇日談讌

述其歸里時同鄉雲公名麟者爲漢中守舊同寅也以七

律四首贈行琅琅誦之云巍然又失魯靈光數遍晨星劇

可傷

在關中二十年蘭舟  
舊好寥寥彩峯又去

慙直何人知汲黯窮愁今日老

馮唐桃花春水情難盡蓴菜秋風味最長臨別莫垂兒女

淚快心第一是還鄉完名全節去翛然梅尉雖卑也是仙

七十乞身猶矍鑠三千歸路任蹁躑趨庭尙有能詩子傾

橐會無作孽錢檢點朱家豪俠氣自怡情性自延年

君性剛直

聞不平事輒怒以是招尤且  
以致疾憊別贈言聊當草佩

宦局如冰冷莫支憶共蘭楫

在天池

余命白河時君爲少尉  
尉白河古天池地

貧能潔已心同勵熱不因人

志豈卑黃鶴乘雲君欲去飛鳥繞樹我何之

慈親八十一矣歸缺菽水

留則素餐見君 雪泥鴻爪從頭說可記烹魚酌酒時戊寅

去爲之憮然 不能具酌君適惠 雙鱸因酌酒歡笑 廿載交如蘭蕙薰鄉思况更接榆枌一

尊白酒傾離緒萬疊青山又夕曛誰向西窗同聽雨我隨  
東野願爲雲何時得遂歸休志布韞芒鞋獨訪君

史彬洵號硯溪山東樂陵人嘉慶庚午舉人補榮經縣令  
前典試四川史松軒評之族也以病乞休咏韓貞女云燕  
南楚北三千里鳳隻鸞孤四十年一意孤行石不轉人間  
貞孝一時全

吳乃鏞號劒溪世居中江以綿州籍入學嘉慶庚午舉人  
鏞幼端謹醇正爲諸生時嘗館一富家夜半主人妾私奔

之鏞語以大義且曰爾一念差果速改仍好人也妾愧悔而去翼日解館歸不與人言次年元旦起盥見盆中有朱衣人持紗帽侍心識爲佳兆是秋果登賢書後十餘年卒先數日謂家人曰有檄至迎我作官俟某日吾赴任矣家人不知所謂屆期果遽逝

姜兆璜號漁生新繁人乙酉拔貢才氣豪放善吹笛工南曲詩筆敏捷一時無兩讀書錦江書院日與朋好飲酒笛聲歌聲喧呼聲達舍外山長愛其才不禁每試前列貢入京孤身騎馬無僕從腰閒橫笛插筆過旅店輒畱題興至馬上吹笛或高歌旁若無人丙戌在都七夕同人雅集口

占贈詩他人代書筆不能給寫畢各體俱備無須敲酌洵  
奇才也七古云英雄不可以駕馭有如鸞翔龍鳳翥風雲  
會合知何時眼前得失無容慮黃金臺上尋同心喜我五  
人名从著天生篁村多傲骨恥干公卿自驕倨文章典重  
古鼎彝品高那屑玉堂署禔侯書聖超時賢遠比鍾王豈  
輕譽吾師梅梁深器之命寫宣公從祀疏襟懷瀟灑何蓉  
生足底仙風冷然御小遊花月菊人家情根漫說沾泥絮  
翩翩公子楊朗山駿馬飛騰窳獨據投壺雅歌文武才坦  
白心胸無猶豫笑我生平氣頗豪大半江山與酒助醉向  
旗亭肆狂吟腰纏幾許都揮去今朝客底換鷄裘開筵我

輩還箕踞旁人搔手仰青天正是奎垣星聚處贈菊人云  
金臺豪飲夜銀漢早涼秋冰盃陳瓜果晶簾挂蒜鉤龍脚  
紅燭照螢散碧星流坐月桃笙冷眠雲紙帳稠分箋招菊  
部合拍唱蓮謳舞學霓裳雅音諧鳳管幽芬芳調粉手婉  
轉貫珠喉態弱雙鬟肖情多半臂畱飛花開綺席行令酌  
瓊甌射覆心思敏彈詞拇戰休箏停頻勸飲酒熟共忘愁  
添箭催銅漏傳觴數海籌瘦腰郎姓沈遠志客依劉玉樹  
聽新調青衫話舊遊曾題鸚鵡賦更典鸝鶯裘樂向閒中  
覓名從謗後收無顏誇市駿有恨問牽牛錦字經年織機  
絲永夕抽七襄前度許一會幾生修寂寞看孤影蕭條望

兩眸人間相憶否天上可知不那復驚風浪原非阻石尤  
迢迢河易渡渺渺願終酬來去橋邊路因緣水面漚紅塵  
小兒女繡閣重衾裯潛步空階拜偷聆暗語羞深宵看駕  
鵲獨宿悔封侯我豈離家慣誰甘按劍投尾偏慚附驥車  
枉過鳴騶鼠璞啞周賈衣冠似楚優登場提傀儡入世跳  
獼猴技伴東山輩才憐白石儔閒身羈別館短鬢倚歌樓  
夢化旗亭蝶書成畫壁虬清聲吹竹笛小引譜箜篌顧盼  
垂青久牢騷太白浮鱸魚思故國蠅虎想梁州萬貫還騎  
鶴三江又泛鷗飄飄仙界侶瀟灑醉鄉侯仔細敲詩眼玲  
瓏寫扇頭倉卒成四十韻對待工措詞雅可謂能人所難



會共五人因在七夕畫扇作巧會圖蓋素工繪事也餘不具錄後竟不達落拓以終卒於前年癸卯

蜀中女史國朝馬士琪韞雪落花十五首雁字十首才調富有生平遺失焚棄者不可數計真女中之英矣張船山女兄弟皆能詩林夫人宋慧殊娣姒亦工詩可謂一門之盛近日陽湖趙雲卿書卿韻卿隨宦來川與諸女伴結吟社郵筒往來亦韻事也秋夜詩朱希蘊句云蟲聲四壁聽如雨小閣挑燈夜未殘趙雲卿云六扇紗窗夜月明橫斜畫出秋花影顧琳云空階落葉無人掃一夜秋聲到枕邊

趙書卿云清夜夢回天籟寂一聲蕉雨一聲秋賞菊曾宏

蓮云興好不妨同醉酒人高何必復登臺張雲霞云若非  
陶令無人識除却嫦娥少客來更以小詞唱酬視追隨袁  
簡齋之門才雖不逮較爲佳話

每縣喜列八景綴以詩景或攝湊詩亦備數甚無取焉而  
藉此遊戲爲詩似莊似謔別有風趣又可喜也陶淑李保  
寧歲貢康熙時任忠州學正禹居蕭寺有八景詩門外苔  
青少客來空庭鳥雀不加猜摩挲十笏渾無事睡眠常因  
一卷開

書滿堂

汲古何人此道傳於今鋤得好清泉逍遙那

更容機智手自栽蔬灌溉便

井

冷官况味媿神仙贏得清

閒無事眠雨過園林桃李靜風波不到泮池邊

撮土

不關

栽竹與時花檢點時新菜與瓜莫笑樊遲心近利比他梁

肉較清嘉

學爲

早歲燒鉛合大丹至今猶未上仙壇老來

學得新方法曬到鴻文仔細看

曬書

鄉關層疊白雲封萬

里奔濤向海宗壯志消磨深未盡中流多少變魚龍

望江處

聞從止水悟天機清淺悠然也得肥若謂沮洳無足樂問

魚方信我其非

池魚樂

稜稜高矗象朝天巧匠終輸造物鐫

莫笑南宮稽首拜側持手版玉皇前

圭山石

桃花魚白如冰雪一名冰雪魚桃花盛開時魚頂骨有紅

一點如桃花瓣桃花落盡則無出梁山縣桃花洞口小溪

中嘉定府樂山縣亦云有此魚流霞片片耀西東幾隊游

魚碧浪中鱗似雪花冰是骨春風點額小桃紅清溪疑是  
武陵津萬點紅浮鏡裏春春盡落花流水遠依然冰雪認  
前身忠州熊文稷桃花魚記云魚形五出色近淡墨有似  
花蕊者其足也生於社日前後桃花開時逐隊而出夏卽  
化去土人以其形似桃花故名似又別一種

重口魚上下兩口似呂字出雅河燕來則來燕去亦去大  
者重二三斤夷人不解食取而烹之肥美異諸魚口多仍  
笑一身孤能把西江吸盡無食指幾人先欲動傳來還勝  
四腮鱸蠻兒未許識珍羞燕子來時結網求料得深山無  
甲子全憑飛躍記春秋

嘉州墨魚出大江爾雅臺下傳郭璞在此注爾雅魚吞墨  
瀋所化璞未嘗至蜀其爲附會無疑第其魚甚美巴縣龍  
雨蒼爲霖有詩云嘉州有嘉魚蹙鱗排點漆龍身燕尾長  
雙鬢并鐵直二月天氣和春風鼓百蟄倔強立泥沙矯如  
樹黑幟市之羅縷膾芳鮮妙無匹夙聞箋蟲魚墨瀋如點  
滴吞之遂潛化如蝕神仙跡郭公固多奇此語難窮極獨  
怪鎮江鮪跳網若銀色千里走京華歲共上方食斯物寧  
不貴何爲故鄉擲悠悠世閒人尙元不如白雨蒼廣東潮

州知府

拙魚出彭縣西北七十里小魚洞其源有山名琅岐空中

深邃莫測卽瀾濛水也中多細鱗魚極脆美每風雷將雨  
銜接而出得其首出者續取以千百計大者徑二尺餘首  
出者驚脫則餘不復出土人謂之拙魚山半風雲湧怒雷  
相銜入網那知迴源深疑接銀河水不向天孫乞巧來此  
魚與山羊羣隨爲首者相似

脆魚最肥美楊升菴云俗名水底羊王西躔詩云霧淞簇  
林團雪花綠波漲暖春無涯真濛寶鏡朝未洗穀紋細逐  
春風斜潛鱗乘霧恣游泳不受鉤餌况長叉千絲翠網絜  
坵側肥羊出水交紛孳生平愛魚勝熊掌竭來正喜隣漁  
家長腰米白早韭綠滿甌飽啖隨朝銜鱗鱮鯉不足數

異種艷聽居人誇老饕臨淵慰夙願筠筐提到羣聲譁細  
鱗密蹙脊難別圓睛巨口開呀呀嶄然大腹濶如斗潔期  
白玉無纖瑕鯨鯢比似體差小白河豚號良非夸進腴獻  
腹古有訓升庵鄉味精無差真州文潛設嘉會河豚假出  
四座嗟苦無脂腴西施乳官伎酷論橫交加我今得此意  
良足桃花醋趁紅薑芽長瓢短箸集朋好百壺有酒無嫌  
賒

白甲魚似鯉白鱗出昭化梭溪魚洞中或謂卽丙穴之類  
益州記謂嘉魚似鯉而鱗細如鱗而肉肥大者五六斤出  
丙穴二月隨水出穴九月逆水入穴按丙穴魚雅州有之

曹掄彬咏之云實海鯨鯢未是奇平羗丙穴毓名鮪春風  
暖送桃花浪夏雨波翻孕子鱖香餌不教吞釣叟深淵應  
許如鷓鴣饒他法網頻加密自有山靈巧護持

虎魚出瀘定橋巨口細鱗肉白而肥鮮美無細骨小者亦  
重數十觔性食魚羣魚畏之如虎王西繼詩云瀘江岸澗  
飛蘆花瀘江水冷波橫斜潭深水碧不見底中有魴鯉鱖  
鱔鯊鱸廳城中水穿郭西流東注交紛掣水急如飛石如  
轉但見白浪排黃沙纖鱗無處寄游泳臨淵欲羨空咨嗟  
瀘橋主人走健脚筠筐翠重寒蘆遮鬢鬣倒拳鱗甲蹙金  
光閃爍欺雲霞怪底連朝食指動老饕狂喜心如麻爲言



此魚鍾育異江湖騰掣爭驚誇衝波力大健於虎橫噬水  
族長專車巨骨中挺絕旁出肥腴鮮白羞豚豕昨宵巨鉤  
餌香餌長繩受困辭長叉廚丁磨刀聲霍霍袒裼奮臂精  
神加清泉清澈活火活水晶鹽逐瓊薑芽我家夙傍雙溪  
許網師漁戶叢蒹葭四鯉鱸魚不足數秋風鄉思渾無涯  
蜀江水漲百川灌難逢蜃蟹稀螺蝦錦江有鯉未把釣欲  
問丙穴長途賒何意堆盤競飽啖列座驚嘆交紛譁酪漿  
却走腥羶辟直教羈客歡忘家

蜀中有駕舟養鷓鴣捕魚者色黑說者以爲杜詩家家養  
烏鬼卽此但水際偶有以是爲業非家家養之其說未確

也更有水猫捕魚水猫形如鼠頭如猫尾大寬數寸大者重八九觔小者三四觔邊地漁者畜之造竹筏往來山河捕魚飼猫於筏以織索綫之猫卽熟睡醒時以魚切肉方寸擲一二塊啗之復臥其用之捕魚也解索下水須臾負魚而出小者數寸大者等身無或遺焉其入水也爲時或久漁人作號呼之應聲卽起更於筏前下網密布猫逐魚得網不致遠逸循網登筏亦併助其力也每得一魚上筏漁者取魚另擲魚肉一二塊猫卽置魚而啗肉食畢復令下捕若無魚則猫不肯下水仍以索繫之復熟睡

周幾東名澍章年少游姑蘇過廣陵泛洞庭溯大江歷燕

齊河洛關陝之郊俯仰慷慨身世坎壈而志氣不衰咏菊  
云不藉春風也自開孤標原不染塵埃荒畦月冷蛩聲咽  
老圃霜寒雁影來爲有清心甘寂寞獨遲芳信漫疑猜頻  
年我亦同花瘦且就東籬倒玉杯潦倒諸生清况可想來  
遊榮署一病不起詩多散軼矣附錄於此以存其概

章紉香畹少時學幕在制府署蔣礪堂先生稱之云非徒  
名幕亦名士也現館臬署好爲詩遊歷邊徼詩境愈奇略  
錄記數首積硤擁空翠飛泉下林端松溪石瀨響雪竇山  
風寒未知途路遠祇覺氊裘單高枕構積慮終夜喧狂瀾  
前行更陟險何處堪加餐且歌將進酒莫悲行路難

宿黃泥堡

入山山轉高勢落羊腸惡虬松故紆迴怪石紛盤錯仰訝  
天柱傾頽疑鬼斧削日光壑底曜雲影衣邊落膽氣誰能  
強脚力石邊弱冰雪乘窈窕風煙走冥漠徒自夢三山未  
能遊五嶽迴車心事微叱馭功名薄危巖競軒舉曉霧方  
闕廓重經魑魅堡衽褐仍索莫川棘天險不可升筮爻利  
大壯飛閣倚絕壁連山屹相向雲水似隔關陰晴各殊狀  
蜿蜒劇鬥爭突兀空依傍心雖雄萬夫到此終悲愴莫倚  
崇墉匝竟作綸竿放徠遠有常經百蠻膽應爽詎知中乾  
徒匡坐誇神王遂令狐與鼠負嶠力不讓虛傳玉斧畫歷  
落空巖嶂今古兩茫茫往來獨惆悵天險

丁濟南號小峯其先西域人占籍成都出身行伍以功至  
山西平垣營遊擊體貌魁梧美鬚髯談笑風流見者不知  
其起自卒伍也能爲詩有問花軒詩草洪芟塘爲作序俄  
洛秋日遠眺云藤杖登臨處山河入望幽風清聞牧笛水  
靜響漁舟暗谷生紅樹寒江漾碧流飛來何處雪吹滿戍  
人頭春遊云紅塵吹過處一望草如茵竹樹千村靄江山  
萬里春尋花香引路傍柳綠侵人乘興歸來晚前川月似  
銀資州夜行用題壁蘭恬韻午夜策霜風雲陰佈碧空霧  
濃千嶂黑月暗一燈紅竹樹濛濛裡人家隱隱中故鄉何  
處是羸馬厭西東歸田卽事云喚醒梅花夢春光遶敝廬

鳥聲盈耳碎日影上堦徐就甕嘗新釀煨爐煮活魚妻孥  
容我傲箕踞笑談餘小葺三閒屋安居頗自如閒身磨歲  
月清夢繞庭除卽事哦新句隨時讀舊書北窗高臥處从  
與世情疎野雀無拘束閒雲任去留不勞嚴武訪嘗作鑑  
湖遊載酒東皋暮談詩北郭秋低徊思往昔客路未停驂  
素有林泉癖於今願始酬泌衡添勝事木石結良儔閒與  
兒童聚時偕野老遊澹懷隨處適來往浣溪頭

葛溶號晴帆溫江諸生好爲詩有集數卷咏岳忠武有句  
云最忍相臣夫婦計誰憐天子父兄仇造語頗新不着岳  
王痛惜之意自見言外

涪州向深女幼從其父授列女傳稍長學爲古文尤喜誦  
誦古忠臣烈婦事嘉慶戊寅九月二十一日生乙未九月  
年十八歸如義義本農家子幼失恃向孝事舅姑尤能得  
繼母懽心農事少暇每勸其夫讀書通大義道光丙申七  
月如義以暴疾卒姑憐其少勸令改適氏以死誓翁嘉其  
志使自守癸卯其翁病篤氏割股和藥以進卒不起有喻  
以無怙無嗣者氏傷之作絕命詞十首自序曰妾涪陵向  
氏女也嫁夫巴邑王氏長郎未及一年候焉卽世昨年不  
幸翁又病亡一家孤弱熒熒無恃朝夕相對只令人悲增  
切怛耳近有無知之輩以不入耳之言來相勸勉俯思衣

食事小名節事大欲全名節惟有身赴東流葬魚腹中但  
孀姑在堂羣季尙幼身死不明未免遺累冷夜掩淚題絕  
命詞十首藏諸笥中他日燒燭檢閱妾之死旣明妾之姑  
無累也噫分書數紙一藏笥中一護油紙藏衣襟中乃於  
癸卯三月朔五日潛至本里溪河荷花灘粘一紙於橋頭  
神壁置新屨石上屨傍粘名節江中見五字已刻投水死  
逾時屍卽浮起其父向深初七日午刻始到檢其周身衣  
履悉密綴麻線髻後繫白麻一絡死已三日顏色如生失  
聲一哭溪中風起漩作大盤渦有掌大白蛾飛浮渦際投  
以焚帛旋見赤鯉一雙各長尺許踊躍翔泳啖食波閒溪



故積水清可見底平日並無浪與魚也夾岸聚觀數十百  
人有泣下者詞曰一從宴爾效于飛心繫王郎不忍歸荆  
布釵裙寒士女豈忘敬戒與無違幼讀詩書雖不多也知  
東作與南訛蒸黎炊黍三更續敢怨微軀受折磨屈指于  
歸未一年兒夫倏爾喪黃泉耕田供職緣何罪妾欲焚香  
一問天躑躅長號呼不應梁摧棟折地天崩捉刀割股尋  
常事這樣恩情得未曾無端婦口勸諄諄憐我如嬌廿五  
春回首當年花燭夜何心再覓畫眉人薄澣我衣省我親  
阿娘亦勸再聯姻栢舟原在中河內母也天乎不諒人夫  
淚未乾翁繼之一家孤弱倩誰持閒來怕讀安仁賦恐惹

孀姑老淚垂吾家西弟宜艱辛能歷艱辛自不貧創業守  
成誰個事須知嫂是未亡人阿翁服制未週年又別孀姑  
各一天此是兒家心恨處披麻一綵報黃泉拜祝高堂不  
必憂兒魂常在此山頭明朝一夕成千古江上峯青姓字  
畱死在初五日詩成於初四日是日夜半綦江吳姓扶乩  
關帝下壇題詩十首眾不解請問 帝君曰可持詩向巴  
縣温塘花灘溪上王姓家查訪吳於初七日至王氏家婦  
屍方獲停柩未殮出詩質之眾方疑訝檢篋中得詩與  
帝君詩同韻始知神已嘉其節而和之矣和詩有云多少  
鬚眉懷齷齪憐他巾幗不欺天又云黑水梁州車迹遍花

灘溪上得完人又云採得涪陵香一瓣坤維正氣喜長垂  
餘不及錄

樂山烈婦魏氏幼字李鐵匠之子隣居相近五歲同入塾  
讀書氏聰慧解文義及嫁針線旁恆置書卷暇輒吟諷年  
十九而夫亡矢志守節以鰥翁同居不便歸母家母亦亡  
父故兵也無子且老每對之流涕曰汝無依而吾將就木  
異日汝以少年孀婦不知漂泊作何究竟吾死不瞑目女  
揣父意欲其有所歸也佯言曰惟父命是聽父喜爲之議  
婚氏端麗溫惠遠邇夙知爭納采焉父許吳某命氏自書  
庚帖嫁有日矣告父市祭品肩輿而往至觀音灘

江水險絕處也謂與夫曰吾近處有親欲往視爾以與先  
歸且拔銀簪投之曰與吾父父無錢或以此償值也父見  
簪心動知有他變急往氏已投江矣岸旁遺故衣一片髮  
一縷蓋恐尸順水下畱以遺父也撈數日不獲鳴諸官時  
綦江令毛君梧生輝鳳攝縣事祭江禱於神翼日得於下  
流十餘日貌如生衣褲密密縫紉毛君爲立廟置碑請旌  
於朝予晤毛君於將軍署細詢其事毛君又云氏爲夫位  
於室置香爐父將祭女揭爐得詩二首有他年華表歸來  
之語蓋死志早決矣氏與夫同歲生死時年二十三道光

二十年三月間

榮縣土主廟祀龐靖侯兼有夫人像配享像忽剝落僧將募資裝彩侯示夢曰夫人落水死當更塑新者明日像無故自仆後數里外趙氏女偶與嫂入廟諦視侯像問嫂曰神像甚佳何無配嫂戲之曰前夫人死未娶我爲汝媒嫁之何如女夜夢侯曰嫂許汝嫁我某日當相迎至期女謂人曰彩輿已及門矣語畢坐椅上氣絕迨塑新夫人像成與女無異靖侯何爲祀於榮且爲之配更屬無稽乃竟駭俗若此戲作竹枝詞云無端廟祀太荒唐絃續居然耀佩璫爲想村巫歌舞日迎神先奏鳳求凰齊名諸葛亦雄哉偉抱原非百里才當日臥龍原自誤黃家醜女也迎來記

詩聊供一粲

灌縣有楊妃池父元炎爲州司戶生妃幼墮此池妃茂州人實非生於茂州也入水明珠光照池先教玉液洗凝脂海棠未破東風軟可似華清出浴時莫訝靈池走一回仙人原自出蓬萊新粧未着凌波鞵誰識唐家禍水來

花蕊夫人故宅亦在灌縣是一地產兩絕色也絕代佳人不易生可憐傾國與傾城海棠委地香銷歇誰道名花又向榮簪花妙格墨流香百首新詞獨擅長不似玉環才調減寫經專媚李三郎

妃寫經藏寺自署善女楊氏爲李三郎寫字極妍麗宋時檢官書故紙中

得花蕊夫人宮詞字體亦妍

漁洋愛顧符種畫棧道圖壬子使蜀以爲先兆畫棧道爲  
屏在山東者有四未知相同否嘗見其一青綠山水皴法  
不盡師古人筆老氣橫名下無虛其間千巖萬壑烟雲出  
沒棧路一線縈紆騎者輿者負者徒者隱現於木末山腰  
中一幅爲精神結聚處數道水滙爲飛瀑懸流直下勢若  
數百丈轟落大川上則飛空架板亂木楛柱似石滑水急  
行者悼慄下復有路在岸邊過客行遠猶回首指顧作驚  
詫狀當時以爲安得身歷其境獲此巨觀捧檄來蜀行過  
寶鷄卽日盼望及至成都無有也五丁新紆諸峽外奇詭  
者不多觀鳳嶺鷄頭特高峻無他奇也乃知顧畫亦張騫

之鑿空耳及涉歷各縣往往於荒山僻徑無意中得奇險  
幽秀之境回視棧道猶坦途亂峯雜沓童童可厭攝篆興  
文時將至境沿小溪而上水清石瘦覺其有異過梅橋二  
三十里平地兩峯轟起不甚高而峭削秀拔石骨青蒼斧  
劈刀割周山無寸土石隙生小松離山數十步或五六十  
步巨石磊落如屋如象負熊爭奇皆貴家園亭不易得者  
忽突兀平田有石約高三四丈橫看似臥側看似立又數  
里遠視有玲瓏剔透者以爲山則小以爲石又甚巨也陰  
雨路滑匆匆舍去他日以事復經其地近而視之玲瓏剔  
透者大於數間屋老松倒垂凹凸皴裂不可名狀有人屋



其下方斧石燒灰又觀突兀平田者橫長五六丈高半之  
渾然一石環者如抱闕者如門陡者如峯垂者如蓮獅口  
象鼻夜叉面孔森然俱備大勢橫展作屏風狀問其名曰  
女兒石也問前兩峯曰碧蓮山也均不愧其名名之者似  
非無識設工畫者寫其貌雖無雄奇亦娟秀可喜然而去  
道傍咫尺行人如織無稱道者官於斯土不一人亦從未  
言及非荒山僻徑猶不過若此阻於榛蕪荆棘人迹所不  
至者更不知其幾矣乃知天下多虛以悅人人亦從而稱  
道之如顧畫之棧道圖是已及實遇可喜反掉臂不顧不  
可解也交卸興文女兒石亦有椎碎爲灰者非五日京兆

所能禁又不徒無人稱道而已

二山屬  
江安

蜀之嚴道舊銅山也其他採銅之處亦多商賈及土人有能識礦苗者礦苗既現攻之入山仍需二三十丈或一二百丈然後得礦是爲礮礮礮既得然後招募炭窰等戶建設爐房箱甄以爲煎煉之具當時油米食物無一不賤山林樹木隨處燒炭故資本少而獲利多攻採煎煉又各視其人如甲與乙同赴一山礮礮相望甲所獲或數倍乙所獲無幾或同一礮共一爐遇甲煎銅每爐或多至四五十觔遇乙則又少至四五十觔自厥衰之後油米食物無不騰貴山林樹木各有地主炭窰日遠供送不易煎煉愈

難銅廠衰憊攻採愈艱百姓開墾既眾深山老林率歸糧業居民往往霸距山林與廠民互相構釁故採銅甚不易言也嘗見陸元鉉銅山行云惟金三品一曰銅四百六十山崇嶺南番色青滇色白出蜀者赤光熊辦銅官廢許民采爭思驅石煩神工靈苗既得寶氣出產銅處每怯膽先有銅苗變勇生歡惊廣招砂丁逾萬指入山采銅者謂之砂丁但有少壯無耆童踐蛇衝虎莽呼喝山鬼彳亍逃無蹤初猶登登事鋤鋪片片削落青芙蓉披荒鑿險漸幽峭沈沈漂黑成甕罐取精在骨不在肉不入其穴難爲功瓦燈熒熒承以頂轆轤絕達泉三重螺旋蟻折窮而曲踏著卽是稜稜峯千按

萬索日劊削菁華漸竭根虛空晝然崩奔石怒落疾雷破  
壁驚魂從有時潛蛟忽起舞失脚遽逐奔流衝亦有毒淫  
積肝膈出竇便已無人容罡風一吹頓僵仆窮山乾死隨  
飛蓬以身試險險難測性命往往輕沙蟲我聞邛笮古荒  
土作息今已多耕農爾食爾力樂終歲何爲入坎忘終凶  
利市三倍已太苦况有大賈專其雄山靈呵護物力足滿  
坑滿谷高垣墉厚輪大郭裕鼓鑄贏餘例給商流通公然  
捆載出關市作姦那免無欺蒙長江鼓櫂達吳楚利與鹽  
鐵同豐隆牙籌算密日益富拍張欲傲多牛翁可憐砂丁  
出死力赤手依舊爲人傭人生豐嗇要有數神不福汝徒

仲仲紫標紅榜亦易散猗頓或與黔婁同不見黃頭郎嘗  
爲漢大中銅山不救飢時窮

自裏塘以西山有出金銀礦者夜現火光如星晝有白雲  
圍山腰喇嘛僧以爲彼教風水所係約束土司以死守之  
有採取者抉雙目或斷腕唐人詩云不貪夜識金銀氣此  
閒寶氣有目共覩而獨置諸外夷華人不敢覬覦造物之  
意未易測也

江水兩岸積沙沙中有麩金居民無業者淘金鬻之掘沙  
成堆或連日不得一星但希冀萬一終歲所獲僅足謀食  
無以此致富者作淘金行洪鑪鑄財作名臣郭家金穴勢

絕倫世人皆慕黃金貴誰識淘金最苦辛朝在沙灘暮在  
水濱衣不掩骭頭不冠巾水落天寒風淒緊赤腳踏石肉  
盡被竹篩篩沙成嶺點金不見愁眉顰家口嗷嗷久待  
哺望眼欲穿祈鬼神嗟嗟爾不敢白晝攫市上又不能昏  
夜乞貴人業此賤役勞且苦安貧食力真良民豪家一釵  
值百萬縷金作裙照眼新造物豈不仁夙生諒有因安得  
東海盡揚塵沙礫變金鋪地勻四民歡樂無吟呻共祝吾  
皇千萬春

西南蠻荒高山夾峙急流汹涌不可駕舟又難立橋於兩  
岸高處各植二巨柱低處亦各植二巨柱此岸高處之柱

與彼岸低處之柱懸一鐵索索外套五六尺長巨竹筒用  
牛革生漆裹護上繫細索其端繫高處柱杪值文報緊急  
民夷往來縛於竹筒以索放之乘勢直下捷於飛鳥此製  
惟天全州多有孫瘦石有詩云峭壁隔長江一繩巨波架  
斷續山風吹側足弗敢下疊石驚濤喧滔滔日東瀉侵曉  
見諸番徒侶遞相迂雙木合并圍束縛及腰胯正擬魚綠  
竿忽作矢脫弮嬾如猱升木連臂枝上挂恍疑肉飛仙凌  
空肅雲駕人閒行路難及此真可訝訖然起蠻歌啁啾雜  
悲咤

趙竹菴從軍日記云在峩邊畱辦善後築堡卡夫役入山

伐木一人爲蛇吞去帳外多虎跡六月圍爐披裘又峩邊  
銷夏贅筆云南山中蚯蚓粗如臂長如蛇初晴雨溼吐五  
色氣成雲中之立斃蜈蚣之大長尺餘採木者見林有蛇  
四足行甚速夷犬身小而健遇野獸奮不顧身虎豹亦避  
之偶炊飯聞異香撲鼻視薪得香楠木花紋甚細色純紫  
惜爲斧析飯亦香美異常有峩邊戎馬圖爲題七律云袴  
褶匆匆作急裝橫腰長劔氣軒昂身經戎馬胸懷壯詩入  
邊山格律蒼瘴雨蠻烟供吐納戍樓烽火費周防當時送  
客無王粲補賦從軍第一章

鍾文彬號筠軒山東諸城人丙子孝廉初補蒲江現任廣



安州寄楊纈亭詩云愁多麴伯亦無靈旅邸更深戶半扃  
春事偏隨人慘淡壯懷已逐鬢零星鄉思萬里談何易宦  
味十年苦備經落寞心情長夜雨一聲聲向枕邊聽生同  
梓里宦同寅知己天涯賴有君蘭氣郁芬情最久琴聲疎  
越淡彌真不隨世眼分青白時向良宵話苦辛何事稽康  
疎懶甚情多反未寄書頻第一首一氣流轉更爲愴惻惜  
不多見

達縣余姓子娶唐氏夫婦相得夫病瘵知不起夫婦議同  
死扶攜至江以帶束縛併赴江流父母尋覓不得越廿餘  
日兩尸束縛水面顏色如生亦無魚蝦殘食報官驗訊悉

其情乃葬之爲豎碑大書愚夫婦墓縣令胡竹堂徧徵詩  
無當意者學使聶蓉峯先生按臨爲題一詩甚佳詩云有  
鳥名比翼雙飛不孤翔雄病羽離褪鳴聲悽愴生與俱  
生亡俱亡矢心白水魚腹藏君不見余家兒婦唐氏及笄  
方于歸琴瑟聲和美夫病啞血勢將不起婦人祇知從夫  
死詎知堂上有翁姑膝下尙無子無子何以承宗桃翁姑  
猶在白髮蕭蕭吁嗟乎女子不知大義一死輕鴻毛未有  
云人生孰不死自古亦難之生同寢死同穴蹈湯赴火甘  
如飴此婦亦可風來茲抑揚得體義無滲漏此詩有關風

化竹堂名光瓚精地理署達  
縣遷文廟而科第遂振

堯湛字露華號東郎溫江人美丰儀豪宕自喜己卯中鄉  
試會試以薦卷挑膽錄未幾卒生平負才不羈家甚貧嗜  
酒狂歌卒以酒病隕身與李夢蓮朱石亭皆美才而不善  
養其才自命過高圭角太露中道摧折可惜也東郎喜爲  
奇崛亦好作豔體名古錦囊集取意長爪生亦早應王樓  
之召其詩生前不自收拾兄溶川存有二冊散於友朋百  
餘首有過爲奇警反墮粗獷略錄其完整者題高祖本紀  
後云芒碭山頭雲氣紫亭長自疑是天子醉放鯨徒直兒  
戲匹練夜揮白蛇死不待歸來歌大風日中早已無羣雄  
天下既定猛士少腐儒乃用叔孫通讀史書鴻門宴後云

座上亞父計奇絕眼中項莊劒如雪冷光射天龍虎迷渴  
鋒擬飲赤帝血樊將軍來何暮交戟不內將軍怒項王一  
叱萬人廢將軍乃敢噴目顧立飲切啖生彘肩沛公有功  
王不恕醉飽便行何必辭魚肉轉戀刀俎處手挈真人出  
營去和浩甫方順橋題壁云老大頭顱太瘦生浮萍身世  
去來輕不祥姓字慚知已無用文章負盛名冰雪關河遊  
子路衣裘車馬故人情宣南朋輩知相憶綠酒紅燈話客  
程三輔風烟接 帝京太行鬱鬱倚官程黑頭幾輩三公  
至白髮催人兩鬢生日落荒村鴉陣急雪晴殘月馬頭明  
悲歌燕趙今誰在愁絕蒼涼戍角聲休將慧業溯瑤京已

隔蓬山幾萬程入世難尋無患子有情便是可憐生送人  
官柳纏綿老笑客閒花宛轉明浪說封侯屯骨相等閒辜  
負子規聲與遲士話近事有感醉後作此贈之云紫瓊宮  
冷雌龍泣天乳無聲溼瑤笠風鬟霧鬢貌天人獨把金芝  
暗烏邑柳花團雪春風香王郎長歌登我堂藥店龍飛愁  
視汝槐街蟬蛻愧稱郎鴛鴦牒碎蛛絲亂膠漆那知是冰  
炭剗盡奇峯剩九疑燒殘心字餘三嘆我亦年來悟上乘  
刹那黑劫總無憑勸君莫墜鶯花障百喚青蒼百不應末  
篇大似長吉

陵井在仁壽豔陽洞旁漢時玉女指與張道陵所開周迴

四丈深五百餘尺遂祀玉女于井玉女無夫後每年取一少年擲鹽井中若不送水卽竭蜀郡西山有大蟒蛇吸人上有祠號曰西山神每歲土人莊嚴一女置祠旁以爲神妻蛇卽吸去不爾則亂傷人周氏平蜀許國公宇文貴爲益州總管乃爲神合媒擇日設樂送玉女像以配西山神自後無復此害兩美和成兩憾消民間兒女得逍遙沉巫不學西門豹月上微聞奏鳳簫

蜀井自宋皇祐始用筒井架木如桔槔懸繩繫木木端縛圓刃如杵鑿石得肩日以升計井口如盃以巨竹去節牝牡相銜周貼井身以隔淡水竹壤有隙能補墜物如針能

取巧侷鬼工又以竹之差小者出入井中爲桶無底而竅其上懸熟皮數寸出入水中氣自呼吸而啓閉之一筒致水數斗豎高木數丈于井傍謂之天杆入井之筒繫焉井側設木以繩絞之宋時用人今用牛掣上機發水瀉流于畦漚于池熬之成鹽鹽多少視水重輕作鹽井行鹽產於海或在池蜀中產鹽鹽更奇水伏於地數百尺地下有無孰得知欲識地脉探水窟還憑巧匠鑿山骨穴細如盃深莫測鑿來那復計歲月一旦水通如通潮長繩竹竿貫一條淡水滲漏偏能補肯使點滴得混淆黃牛挽繩如旋磨自地升天筒一箇傾水成渠如灌畦鐵鍋煮鹽裕國課水

性不一辨重輕得鹽多寡分濁清霏霏如雪市中鬻堅硬  
巨塊運邊氓榮邑邇來商無力苦說井久多堙塞官稅不  
盈頻追呼令我對井三歎息

火井昔在邛今富順榮縣俱有鑿深百餘丈或二三百丈  
熱氣湧出甚或燒屋此其變也製木爲蓋覆井口攔蓋穿  
穴不拘數每穴承以竹筧每竹筧接處纏以鐵于筧鑿孔  
豎以鐵筧氣從筧出置鍋其上引以人火合同而化光焰  
蓬勃隆隆有聲異于常火鐵熱而竹不然猶脬盛之可以  
贈遠一井能供二三百鍋次者七八十口最下七八口或  
火力既盡復鑿得油又或得鹹水三者兼利無算不可爲



常作火井行火井焰騰漢祚復巴蜀幸邀如天福南方丙  
位占離明性雖炎上地中伏屈指與替千載餘遺制猶存  
增感觸鑿井深深不見泉熱氣噴吐似飯熟竹竿引氣如  
引泉支分派別竹續竹煑鹽無復費柴薪更比人間烟火  
速無質亦無光得火如然燭豬脬盛貯密不洩有客贈遠  
攜箱麓陰火浮於水陽火附於木火能生土土生火循環  
安能測化育鑽燧敲石真瑣碎數千百竈相聯屬諸葛當  
年稱盛治通商富國共尸祝非徒火德徵祥瑞調元贊化  
資蘊蓄方今天子正當陽炎威赫赫耀南服

油井亦以木片貼身恐水攙入油在水必上浮可掠取油

竭鑿深偶得鹹水終於油井者其常其色濁其臭惡迎風  
不滅得雨益熾其爲用也可治頭禿利較水十不逮一較  
火十不逮二三歲得六七百金上農夫猶不能及也作油  
井行伊昔秉燭油未作後來銀缸光閃鑠孰知大地蘊精  
液融似石髓待穿鑿初意欲得水煮鹽無水得油悔鑄錯  
良宵不堪置金閨其色渾濁味臭惡濃烟薰騰爭掩鼻安  
得清賞伴花月獨有神奇堪寶貴風雨不滅更昭灼去歲  
海疆頻用兵海舶高大肆侵掠飛機調取來兩川用備火  
攻敵驚愕水濡愈熾千炬紅灰飛一霎斷蓬索天下無用  
有大用遠勝魚膏照六博自悔短檠棄牆角於今白首成



部樂至二三十尺卽可得水不夙卽竭大寧泉流漚池以  
煮鹽裏塘山間泉流鹽積石閒二三尺不待煎熬然有蟲  
虺之毒夷人食之漢人不敢也

華陽縣謝澧號乙山從先君受業後改名振淮以進士分  
發廣西爲宣化令宣化在粵猶爲沃缺乙山不能自潤來  
川時急訪之聞以細故降調全家羈留計年將古稀矣先  
君及門之在川者惟涪州周東泉治章尙健在以書招致  
來榮其人淡於世緣終日靜默以舊詠觀音柳詩見示有  
句云真能觀世垂青眼欲指迷津傍綠波可以觀其志趣  
所在垂髫共讀相見髮已頒白矣不勝今昔之感

劉夢愚四川德陽人秋闈十七次報罷留別詩四首有句  
云豈有文章窮李廌本來支派出劉蕡又云芋圃薑畦歸  
計穩最慙猶有未耐恩語意溫厚而怨益深矣忘其名不  
知後得售否彭星舫誦其爲人題薛濤像云吟鞭幾過碧  
鷄坊剩照蛾眉月一方不及枇杷花樹好至今猶帶美人  
香蟬紗鴉髻妙如神又費輕紗爲寫真筆到花心先白笑  
已輸君是可傳人風致絕佳勝落第作也

趙竹菴在峩邊監築卡有峩邊戎馬圖題者多傑作有二  
絕句云一官遠塞佩吳鉤戎幕寒多不待秋今夜莫教羌  
笛起倚樓人正動清愁椎牛灑酒壯吟懷亦見書生磊落

才邊地霜清風日好弓衣小隊繡詩來風致甚佳忘其爲  
誰作也

王侃號遲士溫江人祖籍浙江湖州府歸安縣好爲詩古  
文以筆墨遊幕有迴風集錄其和小峯家園偶作元韻四  
首云閑庭無客至風月自相於試鼎烹佳茗開園擷美蔬  
暢懷隨命酌得句卽成書坐到花香晚銀河耿玉除享此  
林泉福於人勝百籌曾經三華望更擬大莪遊雪影穆穆  
鬢星光炯炯眸神仙今日是不必羨丹邱倒屣髯公至雙  
扉跌宕開堆盤燒嫩筍洗盞出新醅與世無高下忘形熟  
往來幾回分手處小立又低徊昨日閑相過花閒一枕敲

盆魚翻細藻簷鳥動高枝打點移栽菊商量補和詩吟成  
燈欲施夜雨拂窗時

顧士英號毓芝戊辰孝廉梧生之子也梧生名鳳藻以大  
挑分發來川毓芝隨侍梧生應補梁山令一病遽卒毓芝  
遊幕在省垣少年喜爲詩有紀遊草一卷宿武連驛云燈  
前屈指數歸期惆悵心情獨自知感我征程春草草惱人  
楊柳綠絲絲祇緣作客晨興早每爲吟詩就枕遲旅館恩  
恩投一宿來朝又是看山時有細雨騎驢入劔門小照多  
有題者其耽風雅如此

西川海棠圖合浦李載園爲陳銀官作銀官雙慶班魏三

之弟子蜀伶不足觀二人乃擅名都下或謂魏三美而不  
豔銀官豔而不美魏三學秦腔非正聲又因其善狐媚謂  
之野狐教主當時爲之傾靡銀官兼通幻戲當場弄巧幾  
有青出於藍之譽燕蘭小譜稱其如魚戲水如蝶穿花又  
有咏之者云垂髻狐子比妖嬌剪舌鸚哥遜伶俐形容盡  
矣昔名流談讌各述其鄉物產問蘇州人出何物曰狀元  
再問曰小旦然則二人亦蜀之土產也有人題海棠圖云  
細腰千載說橫陳俗豔休爭別樣春可是霓裳泥沉醉華  
清宮外月如銀翠拂修蛾霞點腮錦官城畔幾經開春風  
帝里花如海爭買胭脂學樣來李雨村贈魏三云一生花



裏活三日坐中香亦佳句也

蜀自張獻忠摧殘後孫可望盡掠川中巧匠入黔一切擅  
名天下之物不可復見觀費著蜀錦譜宋時織錦匠至五  
百人今日錦江徒爲虛名明時川扇猶爲至佳野獲編謂  
其精雅宜士人華燦宜豔女至于正龍側龍百龍百鳥之  
屬尤宮掖所尚今惟榮昌縣有骨扇以絹爲面以絨貼花  
尙不及豐潤扇之工細亦下品也陳三島咏川扇云險絕  
蠶叢地由來宮扇傳大都白帝竹盡用錦官箋出匣風初  
轉垂輪月半圓人間遺玉柄猶是漢宮年三島崇禎閒人  
存詩以見遺製

薛濤箋久無矣明時蜀王猶取其并水造箋入貢異於常  
品是未嘗絕也今無知其遺法者市閒所鬻亦肯薛濤之  
名徒以胭脂水染成易霉無足貴藏紙出西域紙長一丈  
濶二尺四五寸似高麗紙而薄查儉堂咏之云蜀紙遜豫  
章工拙奚足尙結胎多糟霉嘲諷實非謗既失蔡侯傳更  
乏涇縣匠錦城學書人握筆每惆悵孰意黃教方特出新  
奇樣曰搗柘皮漿簾漾金精浪取材徑丈長約寬二尺放  
質堅宛繭練色白施瀏亮澀喜受隕麋明勿染塵障題句  
意固適作畫興當暢裁之可彌窗綴之堪爲帳何異高麗  
楮洋牋亦復讓國家盛聲華夷夏歌蕩蕩佛國技藝能無

遠不籌創東土應誇觀頌美烏斯藏

鄧都平都山廟中有鐵印不知始于何時篆文有總統萬  
靈等字有所謂路引者云執之冥閉關隘無阻人多崇信  
買者雲集用鐵印後復求縣印上憲惡其惑眾追入藩庫  
香火今陵替矣陰陽何處立嚴關祇似循環晝夜間果是  
黃泉攔去路如何逝者不生還作偽無端駭眾聞如狂如  
醉久紛紜羣生迷却來時路應是冥王少牒文

山陰陸敏齋文傑放翁二十一世孫幼隨父宦蜀遊邊徼  
有松月山莊詩集以放翁像刻石配享浣花草堂祠作五  
排記事刻石嵌壁嘗得銅雀臺鳴爐徵詩成集少年俊爽

詩境當日進也健爲道中望峨眉云青衣江上去遙見大  
峨峯壓以雪千尺裹之雲萬重日光團佛現山翠鎖仙踪  
雷洞坪邊路何時一曳筇晚渡滹沱云落日滹沱渡河聲  
滂暮潮草枯沙莽莽風急馬蕭蕭行李書千卷征程酒一  
瓢恆山今夜月不惜解金貂渡河作云燕市唱刀環征人  
返故關長風孟津渡宿霧太行山射策心猶壯揮鞭身未  
閒漸看入雲棧題咏一開顏綏靖屯云風起塞雲黃沙飛  
黑帳房番兒朝牧馬蠻女夜烹羊長夏圍爐火嚴冬飲酪  
漿夷歌聲不斷知是跳鍋裝補官笠澤畱別雲閒云投筆  
西川少入吳折腰初學府中趨閒情慣聽雲閒鶴佳味飽

嘗江上鱸有子何妨妻課讀無田那得吏催租飛觴醉月  
尋常事錯被人呼作酒徒笠澤迢迢谷水通離筵餞別夕  
陽紅九峯送客來天外三泖行舟在鏡中羌笛數聲吹折  
柳風帆一葉指垂虹哦松四載茸城住又向吳江咏落楓  
華陰廟望嶽云華嶽居然在眼前蓮花十丈入雲烟蒼龍  
控盡全秦地仙掌撐開半陝天宇宙名山如此少古今遊  
客幾人傳興來便欲攜詩去落雁峯頭手自鐫潼關曉望  
云直上高樓望八荒函關紫氣曉蒼蒼山形起伏朝西嶽  
河勢奔騰走大梁曠野風沙迷道路遙天雲樹接帆檣時  
平偶過爭雄地憑眺當年古戰場佳句五言如亂鴉飛峽

口孤艇入雲根路槐秦樹古原草漢陵多毒龍晴吐沫怪  
鳥晚爭巢胸澆燕市酒足踏蜀山雲七言佳句不勝錄姑  
從割愛

朱靜生名家庚工詩有觀心齋集與弟遊古杏花村云冶  
遊聯燕翼訪艷宋東家古渡殘桃葉孤村尙杏花雨晴湖  
水近風影酒旗斜坐愛沉香火雙烟上紫霞春思云遲日  
暄風澹宕烟牽情惹恨憶華年紅雲冒樹沾春地玉雨飄  
林上塚天往事疑塵流水外舊山如夢夕陽邊江南江北  
空相望愁聽鶯啼攪客眠大抵綺麗之作居多靜生安徽  
含山人戊寅舉人現爲黔江令

郫縣孫鏗號瘦石自稱獨學生與達官刺署曰大布衣與  
其弟澍子皋以詩古文自任刻虞道園集李太白集明蜀  
詩又修杜宇開明墓亦好事者也飛沙關云嶺斷懸繩渡  
關危壓水開大風吹雨過單騎截雲來巨石訛仙跡

志稱禹產

處飛沙駭鬼才

關外沙朝累累而上夕累累而下

峯巒奇險處長嘯一登

臺咏諸番云落日西岷外重關接大荒築壇高選佛

番僧喇嘛

每死共推一人

列爵並封王

土酋十八部落皆封王爵

塞草零霜白邊

雲耀日黃上公遺像在風雪護沙場

番中要害處皆肖岳威信公及德經略像

百尺玉芙蓉江源嶺萬重饗殮謀虎豹芻豢襍蛇龍屯卒

閒行賈材官老服農承平邊事緩坐鎮見從容楊子雲洗

墨池云豈知尼父爭名日正是姬公盜國年薛濤井云秋  
墳夜雨空荒草古井春風自碧桃題錢尚書集云薊北鶯  
花名士淚江南家國美人情

潘紫垣時彤嘉慶甲子舉入成都人嘗主講芙蓉書院有  
桃李山房圖邀客題咏部選已及作閒雲出岫圖別諸同  
人七律數首已而不果出紫垣父爲陽山令雨村詩話嘗  
記之有韓文公鳶飛魚躍四字揭本韓公不以書名而字  
頗入化紫垣喜馳逐名場與諸詞客唱酬甚多詩集曾閱  
一過失記錄其題范白舫明經花笑廡填詞圖扁舟一棹  
漢江濱風月無邊入譜新但向花前開笑口何妨長作遠



遊人自昔胡仔號隱漁茗溪叢話有新書而今又見詞仙

妙花下吟成畫不如先生有茗門前桃李幾番新院裏芙

蓉補種頻子有桃李山房何幸裁雲縫月手為子寫出錦

江春前和章有亂書古栢連蜷一兩株天香深處醉行廚

寫生更倩黃筌筆補作祠堂雅集圖昨借諸同人武侯祠

谷少尉繪圖

丁紫垣名光陞榮邑人道光乙酉副榜乙未又中副車讀

書三過即成誦詩文揮毫立就題畫蘭云春風吹到讀書

堂屈宋文章有辨香手把離騷隨意寫一花一葉一瀟湘

極有風韻

楊愈千名州英榮縣人康熙庚午舉人任廣東瓊州府昌化縣知縣一年餘卽告終養歸後八十五歲居父喪哀毀骨立旋卒除夕云去家經萬里爲客已三年今夜故鄉夢明朝海外天

榮縣二漁人值雨雪寒甚議於岩下燎火一人往拾薪其一先至僻處見小人蹲岩際左右望疑爲賊掩執之乃枯樹根甚駭拾薪者至告以故笑曰正需此物何懼爲積薪火之逾時香氣撲鼻似炙肉撥灰視之一肉團約二斤已熟透矣擘而嘗之味美以其餘示人無能識者戲爲詩云幾年塵世等勞薪未向冥王乞轉輪饑煞終南老進士貪

養竟讓漁樵人又疊韻云誰遣輸來作鬼薪饑腸對爾轉  
車輪嶙峋瘦骨銷融盡圓熟居然可悅人如柴枯骨足添  
薪眼看飛燐駕火輪坡老黃州空說鬼未嘗滋味也誑人  
錄之博一粲

榮縣何氏子祖母病思肉值旱祈雨禁宰不得已禱神破  
腹割肝烹之以進病竟痊割處亦不甚疼苦作詩記之詞  
如竹枝不欲以文沒質云誰言五鼎博親歡肉出兒身味  
倍甘舉世紛紛誇盡孝算來伊獨有心肝

珙縣出石有紅黃黑三種皆可製器紅者爲佳質尤堅少  
得見黃者次之二種均出自山田中與地主購得然後擔

運大小磊磊然盡頑石子耳剖其中可供雕琢黑者在城外山巖中工匠鑿洞取攜製器始鬆脆雕竣烘以火敷以蠟黝然有光搗出洞遇風則堅凝與石同亦造物靈氣所鍾也趙竹菴詩云昔嘗見玉書黃者伴蒸栗赤者擬雞冠黑者爲純漆因思天地閒靈氣鍾百物玉固受嘉名石亦多奇色嗟予事邊疆捧檄來供職十步一瘦峰五步一縑石如入海嶽中如行仇池側斧鑿美中含不煩五丁力奇巧諸器備迥琢表新式細供文房珍大或等璧玦貴珉自古昔况加以雕飾璀璨耀人目形狀怪非一眾爭寶紅黃我願守其黑誰知泥塗閒特鍾此異質崑圃多瓊玕懸想

未得寶物貴取諸近懷寶無人嫉始脆終則堅介如叶終吉

中江產文石如龜蛇松栢梅竹花草人物等狀元武山上  
有文石泉其出處也采者宜雨後覓之則形倍分明磨洗  
粗質製爲器用又傳唐時田真人與二道人弈擲碁子于  
江遂產碁石今俱謂之花石文石佳者難得碁石則城西  
沿江人戶皆能製造併製器玩戴瑗詩云星精何事隱溪  
灘元武山前秀可餐靈氣獨教奇石孕鴻文一任世人看  
刷開雲樹都蒼翠洗出蛟螭尙結蟠好待輜軒搜抱璞南

宮簪笏拜朝端

乾隆閒健爲梁某過清溪上游犀牛沱見水濱一石花紋  
厯落蠕蠕而動拾視之若有物搖之鏗然有聲不知其異  
石也疑爲怪碎之中有小牛附石頭角儼然抑按微軟血  
水環養石開血流而牛斃矣亦一奇也

嘉慶庚午歲南充修西溪永安橋石工鑿山剖巨石得一  
魚石質狀如鯉長四寸許鬚鬣頭尾悉具鱗色外黝黑而  
內頰黃生趣宛然雖善刻畫者莫能彷彿

世傳空青以爲至寶能使瞽目復明今越嶲多有之而佳  
者難得居人鑿石石中有子狀如鷄卵而小似蛹又差大  
搖之似有水清爲上濁爲下多未變成或絕無或僅得其

半皆未成者破而視之水見風卽乾其成與否未易驗秤  
其重輕非多試無可據藥肆所鬻難定美惡土人持以贈  
客佳者十不得一吾鄉石工鑿石多年或有遇者一人得  
之聞可治日本無恙也思洗之明必逾常旣而疼甚竟至  
雙瞽蓋目被脂朦而目睛未損水能去膜翳故復明如無  
翳而試之鮮不傷矣古詩云服食求神仙多爲藥所誤殆  
此類歟

火浣布出越嶺廳番地五蠻山石縫內生草其根名不朽  
木番民取以捻綿織成布質甚粗性純陰入火不然取以  
抹几染油穢投火中卽有焰騰起取出穢淨而布無恙第

燒一二次布色如灰三次卽質鬆隨手可裂幅短知難作  
襪材火攻渾欲化劫灰誰知小草能堅耐也似精金百鍊  
來清白何嫌質理粗頻經除穢未沾污笑他羅綺矜花樣  
敢向洪爐一試無

華陽洪錫信字信侯少年清才喜爲詩來榮相契戲爲閨  
怨七律限溪西鷄齊啼韻內用一二三四五六七八九十  
百千萬雙半丈尺等字雖未及前人之渾成巧奪天工亦  
可喜也詩云畫樓十丈繞雙谿百尺桐陰半向西九轉腸  
繫千里路五更夢醒一聲鷄鍼饒七夕連番度柳掩六橋  
萬縷齊二四休評八月好兩三回數背人啼其從兄錫璜



字東侯號錦帆由庶吉士改兵部主事寓居南城宅素有  
狐未知也有老嫗見黑犬蹠而叱之忽失老嫗所在尋至  
空房見其昏睡灌醒云有二少年扶至此痛扶之受重傷  
不能聲或云當誅此狐俄而瓦石拋擲一夜乃息東侯約  
客共飲狐於客廳內轉酒罈如丸眾如不見聞其怪亦息  
東侯以御史記名不及用而卒信侯攻苦應試不售發憤  
棄去今遊幕在成都府署閒作小令亦有致

龔禮字少蓮江蘇金匱人少力學淪落不偶來遊於蜀性  
抗爽喜爲詩寄秀山令廖純圃云揚舫錦江邊春風相與  
吹行行殊未已日暮更何之浮雲起空山葉落何淒淒欲

歸指飛鳥涉世舞鳴雞肅肅風塵色此心詎可迷懷刺不  
成字彈琴不成曲起視蒼天高胡爲自局促騏驎羣駑馬  
空懷千里心人世非有恩知己感始深疇昔淮陰侯一飯  
亦千金何況承嘉德飲食兼規箴逍遙道藝苑游戲翰墨  
林四座皆春風習習生古音新鶯困春暮雛雁遲秋陰方  
知窮途淚點滴溼衣襟述懷云七歲始讀書寒暑不爲阻  
十歲學作文軒軒鶴輕舉十五得良師針砭期久處十八  
落江湖肝膽向誰語百歲如颺塵所得有幾許人世如弈  
棋高手偶得之富貴與貧賤輸贏纔一時惜哉秦相斯輔  
政又奚爲詎若商山皓香生千載芝葐懷聊自適大造本

無私翩翩鴻鵠飛燕雀何所知振策萬仞岡悲風起夕陽  
遠路極迢遙對此空傍隍林鶯及春鳴塞雁及秋翔人生  
貴得時感思結中腸萬里黃河水飄然一葦航

劉少漁銜仁江西新淦人祖佳琦成都太守父肯堂簡州  
牧少漁生長於蜀以新例分發到川家清貧嗜古帖名畫  
時以山水寫意喜爲詩小院云小院人來少春晴晝掩扉  
蛛絲黏葉舞蝶夢逐花飛新綠憐芳草微紅愛落暉偶然  
幽興發觸目悟天機

山陰胡茜春世怡來蜀遊幕與諸詩人唱和其從侄和瑛  
字寶臣少年英俊亦在蓮幕不廢吟咏春草云清明連日

雨霏霏繡陌遊人路欲迷嫩綠新涵流水遠疎紅淺襯落花低荒郊曉露攜春酒遠道斜陽送馬蹄莫誦銷魂南浦句恐教遺恨惹深閨

史致山字芝三浙江餘姚人隨兄到川春柳云隨風嫋嫋復綿綿惱亂春光二月天十里綠遮茅店小一枝春占杏花先斜陽驛路嘶征馬細雨河橋泊釣船幾度欲扶扶不起任他低亞碧溪烟

管士村熙謨江西臨川諸生家貧年十二自知力學長遊浙江上百韻詩於中丞楊柏溪先生大加贊賞畱作記室十餘年著有越遊草道光二十四年鄧樹棠太守招其來

川甫及重慶而太守去世榮縣尉鄭竹泉延課幼子以事  
回里與王蘊齋夜話云客路相逢便結歡談深那覺五更  
寒才經磨折方堪用士不遭逢詎免酸絕俗襟懷誰與共  
困人境遇太無端羨君尚有閨中樂問字燈前興未闌除  
夕云銀燈綉綵燭搖紅此夕風光迥不同遙憶兒孫八千  
里團團應念白頭翁佛法因緣信不差書生薄命走天涯  
泉臺有恨應憐我

謂樹堂太守

飄泊無依度歲華畱別鄭竹泉

猶憶東窗月上初啣杯接席意何如掛帆時趁三春末握  
手情深半載餘作客情懷原自淡還家心事肯教虛花前  
惆悵難爲別他日相思淚滿裾畱別王遲士云相親半載

意拳拳想是三生有夙緣  
知己鍾情原絕俗  
斯人得遇實由天  
落花時節爲長別  
缺月輝光不再圓  
路隔八千時已暮  
神交惟有夢纏綿

廖扶九朝翼道光乙未進士由庶常改官知縣告終養家  
居教授生徒京寓元宵有感男兒志四方慷慨輕離別及  
到異鄉遊思乃故鄉切今夕是何夕庚寅上元節骨肉萬  
里餘感此心如結憶昔束裝時經營已彌月雙親強爲歡  
不自嗟黃髮謂兒無念家努力光門閥聞此甚心酸登程  
期已迫衣冠拜別初相視情脉脉殷勤慰遠行勞我七旬  
伯一揖辭弟兄壘篋音兩隔回首囑妻子勉任承歡責低

頭無一言意多苦難白出門捉馬鞭子姪森前列浩然竟  
長往山川幾跋涉離家日益遠獨作燕臺客知己愧吳公  
枉上賈生策偃蹇滯天涯去畱不能決歲月殊蹉跎青春  
又兩越遙想故園中東風或狼籍不得侍壺觴安得親心  
悅只期春酒香老親歡顏接更祈春氣和百花好顏色家  
庭有信來入手忙開拆一語報平安離懷暫消歇長夜且  
豪飲壯心忽奮發眾中縱高談三鼓氣不竭燈前聊短述  
窗外忽飛雪扶九榮縣人其性情篤摯卽此可見惜不多  
作

李東山嘉秀嘉定樂山人戊寅解元己卯聯捷進士官內

閣中書宦情甚淡在都孑然一身告降就保寧府教授歸  
田後足不履城市教讀凌雲山後之東嶽廟妻死不繼官  
斯土者罕得見焉京寓寫懷孤影落天涯新霜點髻華官  
閒疑是佛住久便爲家秋雨凌雲樹春風沁水花歸來偕  
伴侶嘯傲老烟霞

唐雲芝初綿竹人隨父堯春平越府讀書幾于過目成誦  
作詩文走筆如飛嘉慶丁卯舉人遺稿多失僅存一首榮  
縣萬景樓遠眺十年客裏過清明花酒何嘗慰客情咫尺  
家園悲馬磨半牀魂夢亂雞聲黃金有用終歸盡白髮無  
端逐次生空說高樓號萬景迷離烟樹隔蓉城



林志高榮縣諸生從陳卯生遊詩非所習課讀蕭寺閒有  
吟咏和邑令張寅卿荷花原韻曾向名園惜好春落花如  
雪草如茵等閒又到薰風候出水芙蓉最可人亭亭紅袖  
偎銀塘坐愛伊人水一方待到涼生清露滴暗香微度月  
昏黃鏡香亭荷花盛開及菴先生招同岳介之孝廉王椽  
山小飲何來佳客聚今朝爲賞荷花過小橋萬柄嬌紅雲  
影膩一池深碧暑氛消亭中把酒人皆醉竹外吟詩興更  
饒廿四生辰誰是主愛蓮君子幸相邀

文貞名蓉王遲士侃之女年十五知書通文秋夜云隔院  
桂花香階前望月光槐堂秋思遠旅鴈未還鄉山行云路

出深林俯石磯驚人白鷺戀波飛鄉心暫此能消遣昨夜  
初從夢裏歸

繆芝雲庭桂大興人拔貢初任長壽令調大邑升巴州牧  
泝流赴長壽舟中卽景此心原不競踪跡類飛蓬江氣涵  
霜白山光蕩日紅舟遲因水逆灘險似途窮且養天君泰  
看人使順風

孫子皋澍集國朝蜀人詩四十八卷欲觀蜀詩當大備矣  
惜未刻子皋以孝廉爲綦江學博告歸養母同瘦石登西  
城酒樓題壁一詩云日斜江上遠生愁城外岷峨爽氣秋  
碧樹陰中重倚笛青山影裏一登樓

鄒桂林小山巴縣人爲鄧都學博嗜飲作自壽詩數首有句云豈謂奇文爭軋甚幾忘塵戰老英雄又云世途閱盡吟懷減宦味嘗餘老態多蓋以舉人不第自傷首藉盤也  
余嘗作文壽之

沈黼卿廷貴安徽蕪湖拔貢任銅梁令調江津喜爲詩楊花四首云落花如夢草如醒絮影飛空疊送迎岸脚鋪氈三徑軟橋頭釀雪一天晴飄飄水面魚噉細點點雲稍燕蹴輕莫向離人襟袖繞短長亭畔最傷情畫樓西畔粉牆東小住還應寄軟紅撲去煙痕餘淡淡現來曇影太匆匆馬頭塵細黏天遠羊角風狂墮地空漫託楊枝嗟薄命浮

生都是可憐蟲惹得兒童小捉忙白頭如許尚顛狂光陰  
遲莫春三月身世浮沉夢一場底事郎當誇舞袖劇憐冷  
落傍宮牆萍蹤莫恨交猶淺轉瞬風吹又各方託根原在  
最高枝瀟灑丰神不染緇浪跡天涯爭白戰置身闔苑待  
青垂禪心早定參泥絮詩料頻添入硯池遮莫步虛凌碧  
漢纏綿一任好風吹

自東坡用尖父韻後多踵之者欲因難見巧也吳嘯雲祖  
母蔡恭人咏雪有可能刻畫到無鹽句軼其全篇嘯雲補  
成之云雪窗授簡備穠纖記取當時禁體嚴真可翩躚如  
弄玉可能刻畫到無鹽宿根耐凍依長鏡

自註大父司訓  
家居後貧甚

絮影搖清度短簷一角睫巢詩滿壁

舊書室

未應愁緒上眉

尖父字韻云霜痕早拂髻邊鴉饒有吟聲動紡車贏得苦

心蓮結子

蔡恭人有秋荷句云子多贏得苦心多

占成甘節竹生花飛霏各

散思同氣

同祖兄弟各分居

空色難留感外家

三代外家皆無後

若論詒

謀惟筆硯可堪手溺愧温父又疊四五次備極工巧趙氏

女史雲卿友月以尖父韻懷靜香月樵兩女史索和章得

詩後又疊前韻云芙蓉消瘦雨廉纖寒浸紗窗氣漸嚴舊

句未能酬白雪新聲還聽譜紅鹽調高想見眠琴閣才逸

神馳讀畫檐霜信催開吟社早嫩黃初破臘梅尖信煩青

鳥不煩鴉如見停雲玉女車鮑妹才華矜織錦衛娘筆格

艷簪花幽蘭隱谷憐同調柳絮因風是作家他日笋輿期  
訪謁途紆好問路三义李錫桂云廉鉤懶上玉織織病惹  
翻疑自課嚴茶鼎溼烟縈短榻藥欄香氣護晴檐圓勻亦  
愛珠拋米解識深慙水着鹽瘦骨纔蘇三伏熱硯旁閒煞  
兔毫尖音同促織字塗鴉敢學雷鳴百里車銀漢碧長通  
遠夢海棠紅又綴疎花此時月殿頻傳信何日雲駟始到  
家沽酒拔釵羹易作靈泉鯉躍不須义 柱住漢姜孝子躍鯉泉 趙雲  
卿疊云砌下蛩吟韻亦織愁城攻破酒兵嚴半生結習耽  
詩畫五載心情寄米鹽釀冷霜娥頻入牖知音月姊早窺  
檐游仙好紀峩嶒夢縹緲烟巒擁筆尖螺黛慵描驪鬢鴉

病餘閒却七香車忘憂不佩宜男草蠲忿會藏稱意花懷  
遠更多詩寄遠思家頗有夢還家官齋聞似坡翁儉掛壁  
青蚨托畫又李錫桂又和云西風弱柳態纖纖塞雁天邊  
結陣嚴肉眼伊誰超粉黛英才自古困魚鹽蔬籬細雨鋤  
荒圃藥裹斜陽曬短檐回首踏青時未幾紅羅親製鳳鞋  
尖至性深慙反哺鴉尋師久欲買輕車幾時益母親栽草  
何日宜男始種花并曰操持難免俗詩書點定未成家顯  
揚羨煞金閨彥玉樹三株手八又閨媛能以險韻爭奇雖  
未通體自然亦無苛求焉

徐梅橋先生名澤醇正藍旗漢軍嘉慶庚辰進士由吏部

考功司郎中出守重慶修文廟興書院刻善書禁淫詞府  
試卷面彌封詩文有佳者當卽獎譽每出一題必有題解  
合感應篇陰隲文爲金鑑合編逐句引經據史疏通證明  
刊以示人日行功過格在官不攜眷減僕從堆書滿室性  
好古帖日臨廟堂碑淳化閣雖盛暑不輟未久擢九江道  
又陞湖南按察使高祖名湛恩由廩貢生中武舉康熙乙  
未武進士官侍衛因詩稱 旨改授兵部員外郎官山東  
按察司終直隸河東河道總督著有通介堂詩稿選入熙  
朝雅頌集由武改文亦奇遇也子彬道光庚子舉人相丁  
酉拔貢現任工部七品小京官



七絕有似竹枝者鈔錄數首並觀不暇紀名氏無霜有瘴  
是通川元白酬詩語未然樺過夏雲亭下槩薄陰天變老

晴天

渠

讀書臺並釣魚城笑倚桃絲竹杖輕合作仰家聚

頭扇東川新樣勝南京樹擁荒村竹覆溪斷無碌碡碾春  
泥山童細剪元修菜要點辛盤乞醉題齊甜辛苦韭離披  
不種來牟種茜卮聽徧前村珠絡鼓鷄豚爭賽竹王祠天  
倉天柱曠躋拔石麪勻磨一飽慳種樹祇誇黃樹坎求魚  
休問白魚山暮暮朝朝白紵衣掠檐蝙蝠到偏稀撲來漫  
認蜻蜓小此是花蚊作隊飛木桃花與海棠同結子還堪  
賺獠童饑煞林禽酥樣軟搓來也似佛脣紅

雅

安驚雷破柱

尋常事暴水齊簷頃刻消深夜喧林聞鳥雀

夜閒飛捕禽鳴爲常

白晝見鷓鴣

雅州梟鳥白曰飛捕麻雀而食

蒸穀家家炊火米

雅人以熟穀碾米爲

火愁霖日日怕雲生

城東蔡山俗名周公山一有雲氣卽雨

白鱗丙穴魚偏

美綠脆蘆山茶更精

蘆山產綠菜味如江南紫菜

七月枝頭山杏黃衣

裘朝暮尙生涼吹來風味人爭嗅共羨嫩茶糝杷香

番蠻以青

裸炒麵澆以茶名曰糝杷

風撼庭柯水嚮雷晴陰倏忽費疑猜霎時但

覺軒窗黑海子妖雲送雨來

城外海子乃水池午後卽有怪雲風雨

石路參

差隔短牆青山缺處漏斜陽怪他路上人如蟻盡道嘉眉

蟲客忙繚垣藥草掌高低晴日黃塵障馬啼穀米論筐爭

上市建城二月綠秧齊翠芽誰採滿筠筐穀雨年年入焙

香寄語懋功屯務府好將雪水試旗鎗窗明積雪堆高嶺  
坐擁紅爐蒸篆香不是友人分角黍那知佳節又端陽可  
知西南邊塞諸境矣

四川西境番夷至成都入貢大路昔有紀云藏番去來給  
羊麵各踞竈觚炊且熟脫衣袴坐地食食竟頰面以丹點  
額及頰撤帷出人矚之則恚其貢小鍍金銅佛小銅寶塔  
彩色小畫佛銅鐵盔甲及珊瑚唵叭香舍利子小綠豆紅  
紫色各色氍毹等貨又細毯工部疊毯絨邊工毯姜納大  
貨貼裏綿憑粗細顏色定價喇嘛包一馱日給雇騎銀兩  
狡番匿包索價則縣吏給金不貲

李海騷觀察長於古文詩亦宗唐不蹈宋元蹊徑有寄鴻  
堂集太白樓云如此青天月當年照錦袍江山何壯闊詩  
酒自英豪我亦狂歌者登樓吸海濤謫仙呼欲出好與釣  
金鼈中秋舟次云此夕關山月天涯想共看雁聲青海外  
鶴影碧雲端遠水生秋白孤帆入夜寒故園書未達仍說  
在長安鑑湖夜泛云一片碧空月三更海上來湖光天際  
落帆影鏡中開賀監今何在青蓮去不回空畱劔南蹟千  
古憶詩才甬江云一櫂甬江路烟波萬頃開斷虹辭雨去  
新月帶潮來野戍旗燈閃巖城畫角催海氛猶未靖誰是  
斬蛟才泊金山寺云浪白全無土天青忽有山樓臺金碧

潤僧佛水雲閒塔影凌秋靄鐘聲出夜闌裴公開坐地星  
月自迴環登安慶城樓云天關小蓬萊烟波繞郭迴地分  
三楚斷城截九江開秋色舒王國寒雲皖伯臺登臨殊未  
已新月海門來新津渡云新津凌曉過日色上行睇野草  
鋪殘雪空江浪斷冰巖疆方栗冽猱寇尙憑陵捧檄籌邊  
去迂疎恐未能夾江道中云雨雪阻關河衝寒攬轡過軍  
裝連百里烽火逼三我劍氣凌晨動笳聲入夜多安邊須  
善策壯志莫蹉跎

程祚蕃字錫餘號初民江西南城人由恩貢任四川秀山  
縣知縣登滕王閣云衡雲遙捲蠡波浮都會東南一望收

紅日旌旗曾駐節，綠楊簫鼓又停舟。寒潮滾滾疑無岸，暮色蒼蒼欲上樓。獨有才華傳韻事，江山管領屬名流。再遊麻姑洞，王琢軒、蔡漁磯、雲友與同往。十年躡屐一來遊，今日重尋又晚秋。宮闕新看畫棟改，煙霞長伴秀岩浮。詩人大半神仙裔，舊夢都成爪跡留。底事野夫相問訊，滄桑振觸起牢愁。時半山亭老人話及鄉里舊事。畱別李繡裳、孝廉、頗善相，如病能爲長吉吟，心肝鏤冰雪，風月寫胸襟。仙骨君身有，名山客夢尋。不須方外想，鰲頂可相尋。將之蘭陵，蔡凌庵師以詩贈行舟中。賦小詩奉謝，自愧迂疎甚，頗年作客忙。仗行看寶劔，借渡試輕航。入幕休嘲郗，登樓強效王。所忻肝膽

共風雨舊聯牀

時就館芝園家兄府署

同王約餘道上觀梅寒威烈

烈賦閒居彼美遺來尺素書中有一枝春寄我吟哦在口  
香雲舒冰魂玉骨本高致難得賞心爭把臂君今修到儼  
如仙鐵石賦成能嫵媚曩歲同步城南隅招邀有意彼此  
俱昨者無意道相遇倚裳躡屐追歡娛君逢梅花如逢故  
我忽逢君亦前數三生石上有奇緣想是林逋心不如君  
身化梅梅化君得親臭味有餘芬底事仙姿溷塵俗山阿  
水曲漫爲羣嗚呼曩歲看花花半落今歲看花花漸開花  
開有似學繡時女兒不嫁何爲哉

徐問源灼都昌人隨父綿州刺史之任年少喜爲詩現赴

東河報捐知縣醉歌行示友人天蒼蒼海茫茫長鯨一吸  
空千觴人生百年須臾耳胡爲不肯飲刺促多憂傷一飲  
一斗愁于何有一飲一石狂呼濡首生不學劉伶荷鍤隨  
死當葬入酒人口獨醒從來古所戒酒徒矜德毋乃醜痛  
飲狂歌自足豪醉鄉地闊君知否跣我足脫我裳扶相如  
壁登匡牀酣呼一覺夜未央陶陶之樂追羲皇秋夜曲秋  
風清秋月明秋蟲唧唧成秋聲銀牀冰簟不成夢攬衣起  
看秋河橫美人迢迢隔秋水鳴琴誰復相詞賡空階涼露  
濕金粟相思秋夜難爲情不寐不寐還思起小燈搖畫楹  
夢回憎鼠鬥宵短憶雞鳴溫飽豈吾志炎涼徒此情芭蕉



窗外列何事雨聲聲對月月又圓如此春人怨夜遙露濃  
花影重風急蝶魂銷斷夢懷湘芷深愁賦楚苕清暉如有  
意莫照短長橋敗蕉碧月穿窗影不圓秋闌瘦損美人肩  
相思綠綺曾三疊孤負紅心又一年不分飄零還入畫自  
憐憔悴誤題箋銷魂多少闌珊意半在將風欲雨天白菊  
怕染繁華半點塵獨標清韻在方盼粉香欲混穿枝蝶徑  
仄時迷送酒人霜壓梢頭添色相月窺籬眼見精神化工  
不是無顏色要替秋容一寫真

楊文泉得質署峩邊值夷匪出巢于途借嘉定府兵二十  
名募鄉勇五十名途次逢賊直衝賊隊入城嚴守候省中

發兵擊退九月夷匪復出軍書旁午作峩邊守城圖詩以  
紀之蠢爾裸夷出共驚烽煙四面撲山城城名大堡何曾  
大搜甲登陴止百兵我稟機宜初赴省聞風星夜馳回境  
沿途抵禦費艱難招募衝鋒踰梅嶺嶺西扼要是官坪夷  
賊焚燒斷路程放礮開鎗一擁過羣蠻鳥散漫狼行迅速  
申文請靖亂軍書旁午馬血汗出師統領有專官勝算獨  
操辭莫贊蠶叢兔窟看羣蠻射聲蜂目太冥頑正欲痛剿  
除民害走竄箐林萬重山上山真似上青天附葛攀蘿一  
線牽竹樹陰森風露冷俯看足下起雲煙陰雨蕭蕭時撲  
面大軍固守難酣戰未嘗掃穴與犁庭收兵何煩勇將殿

金戈鐵馬久相持妙用忽云用撫宜縱敵從來多貽患此  
計難瞞小民知鬪皮吃血從蠻俗灑酒椎牛謳猺曲齊唱  
凱歌跑紅旗虛糜奚止萬鍾粟籌邊果否能弭患良策也  
將善後辦畱兵防堵若相連厚償仍將兇夷豢受降城竟  
未貼然蠻夷雪夜出我邊誓心不避艱險事重整征鞍再  
着鞭

劉敏夫肇堂州牧石麓先生子隨任四川後指捐四川佐  
貳好吟詩登鳳嶺絕頂題壁昔聞鸞鷲鳴高崗至德所被  
來麻祥秦山峩峩插霄漢景行行止長相望我今策馬向  
西來千盤百折尋羊腸怪石礪礪礙行足奇峯卓犖森劒

銜凌雲直上摩空際溟濛一氣連穹蒼仰觀日月極浩蕩  
俯瞰山河窮遐荒雲煙吐納盪胸臆振袖惟有天風長安  
得招隨碧鸞尾乘之遙入白雲鄉安得遠尋青鳥使直登  
閬苑餐雲漿仙乎仙乎作奇想真宰上訴天蒼茫長歌一

聲振岩谷山靈應笑詩人狂

陸敏齋寓  
作消寒會

閒煞雙遊屐寒雲

玉壘封雅人居勝地高會創隆冬我豈劉公幹君真陸士  
龍山陰褰薜荔城畔采芙蓉早捧江南檄曾哦月下松祇  
緣吟興健轉覺宦情慵蘿徑蕭奴掃珍廚黨尉供鑪飄烟  
裊裊簾護影重重共挹汪洋度全消芥蒂胸翦花銀燭豔  
潑酒玉缸濃清讌今方始吟朋夙所宗高文皆董賈法楷

及王鍾畫挾倪黃妙詩追鮑謝蹤居然三善備何幸七賢  
逢且盡杯中物休看鏡裏容園梅初放蕊索笑雪風衝陶  
然亭小集疎蟬吟咽夕陽遲梵宇幢斜柳影移故老清遊  
微醉後葦花白上鬢邊絲

王蘭泉司寇諸人游此有詩碣

保陽道中寄友

入匹馬幽燕路蟬鳴日暮時問程尋古驛選勝剔殘碑行

色琴書壯雄心劔佩知何當尊酒共相與訪蓮池

郡故有蓮池書

院未  
果遊

錢塘女史孫佑純號小雲隨父宦蜀適石泉郭君之子蜀  
江名錦和郭君卒于任家口不能歸蜀江以諸生遊幕劉  
玉坡先生任蜀藩司愛其才撫浙時攜往小雲從夫行既

而避兵夫婦仍回蜀極唱隨之樂有鳳翥吟稿蜀道路險  
峰尤峻溪流石有聲白雲隨馬渡紅日逐人行飲澗猿何  
捷棲林鳥不驚菊潭遙憶處分影話前程綿州小病兼句  
寄懷汪小勝表姊深閨分影已三秋遙隔天涯憶舊遊芳  
草綠迷爭撲蝶杏花紅綻共登樓病中最怕思前景酒後  
更多惹別愁寄語雲牋休誤遞飛鴻時盼到綿州秋感桐  
葉驚風落涼生滿簟幽白蘋江上雨紅葉嶺頭秋楚客添  
鄉夢閨人感別愁眼穿雲外路何日鴈書投秋夜寄外獨  
步憑欄看銀河已四更夜深蟲語急人靜月華明蕭瑟秋  
光冷參差斗影橫數行雲影澹幾點露珠瑩惆悵千山隔

相思兩地生客中腸應斷閨裏夢難成底事多離別皆緣  
絆利名何時一尊酒同話此宵情暮春望楚信不至芳草  
侵階綠憑欄感落紅數聲鳩婦雨幾陣鼠姑風又覺春將  
盡如何信未通不知人健否盼煞楚濱鴻秋日病起西風  
涼拂雁行斜病起微寒倚碧紗怕向堦前看菊影近來人  
瘦不如花

二江沱去成都北門三十里温江諸生楊公瑞宿其處見  
旅壁題云淮陽韋可卿偕金陵金素蘭返嘉陵二江沱待  
舟旅次以江沱二字分韻題壁云錦水滔滔匯二江喜看  
春色滿蘭缸仙源有路同茲去願把離情付碧淙和素蘭

韻云考古難分江與沱漁人紛影水中過相看咫尺如千里待渡無梁喚柰何素蘭原韻云行行已別二江沱數里烟村一瞬過欲向桃源尋便棹離懷不已可如何和可韻云春風嫋嫋漾晴江幾片飛花落釣缸莫怨柳絲長繫艇好將別夢逐流淙別有序云素蘭金氏吳人也父宦於蜀值西寧事發遠竄荒裔一家流落奉母命報德姬侍安漢鄒魯齋公子曜廷內政隴西夫人聞之不勝忻喜賜賞有加妾雖遭家變得蒙公子夫人撫恤復何薄命紅顏之悼哉今公子貢赴太學遣妾歸奉內主又得韋宜人一路提挈彼此唱和頗不寂寞惟是童稚其心未解捧輓之殷



徒思拈筆之樂聊述所懷不當詩人一噓也昨夜侍郎眠  
今朝各分手郎從京華去妾欲歸田畝男兒重功名女職  
惟井臼喜得賢夫人待妾若賓友相愛再相逢朝朝樂棋  
酒抱衾入蘭房鏡聽猶得偶兩地別離情三人一樣有今  
夜郎何處知妾宿此否可卿讀之以爲情致纏綿使人亦  
有別離之感爲賦長短句云悵離別悵離別一江春水情  
脉脉以下漫滅不能辨識末後歎題歸明峰韋氏

華陽潘紫垣之子小垣文錦喜作詩家學然也清明郊行  
云鳩聲燕語又鶯啼最好韶光錦水西拾翠人來芳草岸  
踏青屐印落花泥桑田樵熟知蠶老柳陌陰濃聽馬嘶遙

指酒帘高掛處買春乘醉好畱題初夏云錦城春色已闌  
珊月屆清和氣尙寒三徑綠陰飛絮亂一庭紅雨落花殘  
遨頭宴向閒中過婪尾杯從醉後看昨夜甘霖滋沃野江  
村美景更多般冬日曉發錦城應試溫江早出錦城南行  
人恰有三孤村朝日上野店曉烟含筆健文思富詩成酒  
興酣蘇坡橋畔過小憩一停驂和王蘭汀茂才家齊春陰  
二首幾日晴明幾日陰匆匆花事又春深海棠院落紅香  
黯柳絮池塘綠影沉把盞聞鶯新釀醉捲簾待燕嫩寒侵  
巴江浙水迢遙隔有客高齋動雅吟誦罷新詩幕輞川青  
箱世業紹家傳三春作客無多日千里論交有夙緣折柳

橋邊攀柳日浣花溪上落花天他時桂樹飄香處月窟看  
君領眾仙

張潤方霍山東歷城人任鹽源阿所拉巡檢喜爲詩於楊  
味禪處見游擊丁小峯談詩契合遂交往甚密山行卽景  
云一望荒涼景身臨地不毛溪流冲礪斷山勢入天高路  
險雙肩蹙風寒兩袖飄從容呼野老問俗酌村醪僻壤無  
人到千年古木又林深荆礙路石亂水翻花敗草青蕪護  
啼猿綠樹遮遙峰銜落日緩轡看明霞信此山林大重裘  
六月天晴猶飛細雨午不斷蒼煙樹挂苔成線峰餘雪及  
肩看他陰毒處水色綠紅鮮者處韶尤好垂鞭興不窮花

間千顆露柳下一溪風水浸秧針綠籬遮菜甲紅山家多  
趣味駐馬問農工和丁小峯遊戎韻云名利關頭破柴門  
不必開春風聯舊雨秋菊釀佳醅酒逐閒愁去詩吟逸興  
來花前明月上得意儘徘徊

題涼山踏雪圖者甚多皆鋪張揚厲或語過其實李五子  
惺掌教錦江書院僅題七絕二首語諧妙別開一徑不向  
如來行處行也大涼山下小涼山山在南邛北笮間一色  
裝成銀世界不知何處是烏蠻天將絕境試奇才捨却肩  
輿亦壯哉幾個詩人驢子背可能駝向此中來

翰林院侍讀曾滌生先生國藩湖南湘鄉人道光癸卯典

試四川喜爲詩及門以詩請業者輒欣賞訪苗仙露云大  
隱東方朔著書揚子雲出門無所詣落日一從君倦鳥宜  
何集閒鷗亦有羣烹茶餘幾火小啜愧殷勤梓潼道中懷  
馮樹堂陳岱雲複嶂七盤相約束清流九曲與周遭日高  
旌旆烏蛇亂秋老爪牙鷹隼豪北望幽燕天澹澹東歸歲  
月水滔滔江山如此知交隔獨對菱花數二毛

鄭有菴逢年歲貢郭之西郭人家貧以醫自給爲人清高  
年及六旬詩稿數千亦嘔心長吉也友人送菊植於盆中  
悵然成詠四首人前秋思費推敲一卷閑詩作解嘲托足  
幾年成市隱放懷今日結貧交孤高境界原難立冷淡生

涯莫浪拋擬買一樽先自酌可容彭澤共誅茅休誇蹤跡  
托長林塵世論交總不深老去果誰存晚節生來原自抱  
秋心一簾烟月增高興三逕風花起暮吟門外白衣頻送  
酒階前文燕日相尋西風一夜遍江村身世年年笑瓦盆  
入境人難容傲骨天涯還好托孤根秋前灌溉逢新雨酒  
後荒蕪想故園老在鄰家舊茅屋斜陽相向掩柴門南山  
秋色上東籬我亦臨風種數枝遺世本來同隱逸傍人原  
不借扶持蕭疎氣味從君得培植心腸轉自疑珍重牆頭  
梅竹影淡交各耐歲寒時丙申除夕病少解賦此自慰青  
燈悲永夜白髮臥經旬世擬收窮鬼天畱作老人藥爐烟

影散竹閣露華新行此含鴈樂餘年現在身遺興頭白歸  
來萬累輕樵兒漁弟踏歌行閒雲野鶴三山影春水桃花  
一笛聲日落半肩秋雨滴潮回十島晚烟生人間得失尋  
常事付與雞蟲自鬥爭

陳博菴名厚成都歲貢少年任俠好客艱于名場年逾七  
旬猶教授生徒云有感南來依舊是薰風人事經年大不  
同記得石榴花下飲一枝爭壓酒籌紅苔文不種芭蕉綠  
萬重而今遍地是書傭草成露布調蝸戰篆得雲章冊蟻  
封石界烏絲春雨潤花臨粉本曉烟濃人間儘有奇堪賞  
領取飛鴻爪外蹤送曹易菴赴維州瑞總戎西席書劔飄

零休未休送君今又赴維州半生衰鬢客中老一片孤雲  
塞外秋攜幼漫愁同乳媪求師可信是賢侯讀經暇日容  
瞻眺應上籌邊舊日樓甲戌元日得得今朝又一年春風  
爲我盪塵緣浮雲富貴原難料舊日聰明亦浪傳自奉閒  
身歸酒裏相持高興到梅邊題詩寄語看花客解否韶華  
在眼前風波行黃河之水孟津渡人爭渡口管烟霧一渡  
纔往一渡來來往不復問朝暮其中何色人最多賈人重  
利輕風波大馬高車貨盈載燕南薊北驪駒歌歌驪駒過  
河半水氣騰空連霄漢天外黑風捲浪來一聲搖撼船皆  
亂欲泊不可泊欲行不可行雪光萬層湧雲勢千尺傾沈



珠未知是天心投璧或可邀神眷  
檣斃楫折在片時生存  
死亡爭一線吁嗟乎險莫險於此  
渡兮悲莫悲於斯人誰  
非父母之遺體奈何殉賄而亡身  
寄語黃河船上客斷梗  
飄蓬非長策何如解脫名利網  
樓鞋桐帽聊自適

權美堂名祖彥鄆縣人道光乙酉  
孝廉耽詩成癖主講岷  
陽書院冬夜感懷霜天風送遠  
鐘聲犬吠鄰家夜色明再  
撥火爐茶又熟頰呵凍筆草初  
成翻殘窗月書三卷打盡  
燈花鼓四更總爲多愁人不寐  
欲從釋氏學無生感懷黑  
雲堆裏電飛紅霹靂無端鼓幾  
通眼底波生翻手兩胸中  
熱退打頭風不關榮辱名何惜  
已涉猜疑志豈同一曲廣

陵無處寄坐看新月上梧桐雲棧天梯夢裏途長安屢被  
鬼椰榆可憐此日猶懷槩未卜何年乃棄繻燈火結緣來  
後輩文章造命說先儒自知福薄多因做問有金丹換骨  
無

范固菴守貞鄆縣人嘉慶癸酉拔貢後舉壬午孝廉林泉  
養靜有高致年五十餘矣癸未二月京邸爲同年趙步墀  
志彤題空山流水茅屋板橋疎松漁舟畫圖共八首一幅  
縑緙畫得成山光水色遠分明松濤護謾伊誰和三兩漁  
舟欸乃聲諸峯了了勢嶙峋淡寫輕描象逼真倩得阮孚  
雙蠟屐幾回踏遍亂山雲春波蕩漾活餘漸自在中流放

棹時最好月明吹短笛一江風浪走蛟螭數椽茅屋傍山  
坳短短疎籬竹影交指點桃源看是否柴門月下待誰敲  
清溪一帶繞山家雁齒連連整復斜影倒雙虹波浪息長  
江點點濺松花本自孤高逞俗氛蟠根絕巘拂寒雲蒼蒼  
老幹疎疎葉漏出山間月二分輕舟泛泛逐烟波四面雲  
山瞥眼過一夜斜風兼細雨漁人驚起唱漁歌山川景色  
自幽深盪漿停橈古木陰路入輞川圖畫裏頻將八法寫

雲林

黃海嵐鏊鄆縣人道光乙酉拔貢甲午登賢書甲辰大挑  
一等淡于宦情願改教士詩其兄兩嵐乙酉孝廉現任中

江廣文老將矍鑠精神想據鞍飄騷華髮獨登壇熊飛渭  
北韜鈴著虎射山南石影寒苔臥綠沈槍半段柱標青海  
鶴雙盤長城萬里 朝廷重賴有冰心一寸丹老妓舞楊  
歌臺迹已陳南迎北送倦風塵魂銷楊柳臺邊日暈褪桃  
花臉上春此日紫雲應寄恨當年白傅益傷神門前冷落  
無車馬又抱琵琶嫁買人

吳斗南文光邨人天資卓越洒落不羈道光辛卯舉孝廉  
授廣文咏竝帶菊云孤根原不望人憐况有同心得氣先  
秋意爲誰爭淡冶化工亦似逗芳妍分黃久換東籬骨共  
翠應迷老圃烟寒夜酒闌明月下只疑陶令伴花眠有骨

黃花歲月侵移來瘦影竝森森每於淡處求仙侶不向朱  
門結素心開逕誰愁風雨細蟠根共傲雪霜深白衣人到  
成三友把酒同邀皓月臨

袁靜溪茂才名涖鄆人和平溫厚藹然可親年踰七旬人  
稱矍鑠上巳同遊到野菴遙天一色碧相涵陽春已去九  
分九被禊剛逢三月三浮白只堪澆磊塊踏青還可縱清  
談韶光美景詩千軸好句盡收入采藍叢望祠堂四面青  
浮雲掃淨野烟輕梨花柳絮原同色曲水流觴暗有聲我  
縱無緣春豈寂君多好友趣橫生來年若再行時樂花下  
相逢又暢情此上巳與諸友修禊詩也

蘭藹如芝秀，郭縣布衣始。改習長桑術，家清貧好詩。田家  
節景山光鳥語任，消愁地接江邊景。更幽晴日萬家春，水  
闊溪烟拖過打魚舟。閒居卽事儂家小屋盡，誅茅籬落疎  
疎間。荻梢臨水柴關扉，半掩依牆斑竹影。全交蛛穿網網  
窗簷挂燕啄，飛花帶雨拋。我有閒情頻眺望，欲裁新句漫  
推敲。窗前綠映美人蕉，獨坐空齋感寂寥。三徑菊繁隨手  
植，一爐香好帶心燒。息機未必逢人避，處困難將舊友招。  
惟有書淫與詩癖，時時遣我悶全消。秋燕天涯漂泊畏人  
侵，寂寂樓頭夜雨心。擬欲辭巢憐舊主，夜闌還自語花陰。  
蕭寂之景溫厚之意俱見矣。

黃旭初茂才曷郟邑孝廉海嵐子春日王小嵐柏坪昆玉  
招飲此身如寄嘆浮生亟訂詩盟與酒盟花草也添今日  
興江山尤助故人情白駒過隙光陰逼黃鶴摩空志氣橫  
應有小鬟催客至彈箏直遇許飛瓊秋日答敬勉亭之作  
疎懶徒畱自在身忽逢佳節近霜辰風雲無意休嗟命松  
菊猶存不買鄰願得有田同負郭且將荷篠學耕莘思君  
此刻添佳釀一日三餐酒一巡

刁宅三僑元郟邑諸生負清才有詩癖秋吟云手把一樽  
酒能澆磊塊胸寒蟲多細響病鶴有饑容秋到昨宵雨月  
明何處鐘故人天未去相憶不相逢高堂多白髮墳里隔

青山佳節思親甚，秋風作客閒野。花自開落，林鳥時往還。  
境僻無人到，貪眠晝掩，關露冷，枯荷盡。風搏敗葉，稠蟬聲  
鳴似雨。人影淡於秋酒，醉敲孤枕，宵寒戀徹，裘誰家三弄。  
笛勾起，別離愁。寒菜閉門親種，要誰看。老圃荒涼，露未乾。  
豈必生涯長冷落，別饒滋味，異鹹酸。霜華小擷鹽齏，雪  
影仍堆首。宿盤莫使菜園羊，踏破曉菘爛。煮日加餐。

間霞九有光，鄆邑諸生雁來紅。江楓爲伴，蓼爲鄰，獨被霞  
裳照眼。新入夏，已先含紫氣。經秋自許，出紅塵，生成血性。  
無嬌豔，鍊就丹心不老。春天外，飛鴻風正順者，番芳信有。  
前因和何少尉上已約同人郊遊登觀稼亭之作，情鍾林



下客景觸宦遊人卻愛鶯求友翻欣燕作鄰一樽沱水釀  
千里曲江春莫笑風塵吏而今盡滌塵

郫縣上舍趙蘊山芝玉少年喜爲詩寄王柏坪屈指論交  
二十春白頭相見倍精神宜將野鶴爲清友稱與梅花作  
主人詩律晚同工部細文章少擬子安新晚烟斜日西村  
路來往因君不厭頻寄懷王小嵐柴門臨水絕塵氛六逸  
高風又見君卷帙餘情成蠹癖烟波清夢與鷗分庭蘭秀  
茁三枝玉湘竹青浮牛榻雲可惜生花一管筆名場何事  
阮劉蕢村居和陳寶山參軍韻近水茅廬遠俗囂繞籬春  
盡長蓬蒿歸田跡擬淵明嬾縱酒情如太白豪俗不能醫

思對竹詩多成讖悔拈毫及時我亦須行樂莫待霜華染  
二毛歸自灌陽滿天風露曉蒼蒼獨客衝寒別灌陽遠水  
碧涵鷗影小落花紅襯馬蹄忙隔江野寺山三面抱郭沙  
堤柳一行何處有邨何處飲吟鞍扶醉過新場五疊王柏  
坪見寄原韻瀟洒真堪八達羣一杯閒對鴨爐薰紙窗水  
閣花全掩竹塢梅坪月共分蟲語喚回塵客夢雁行劃破  
蜀天雲催詩人比催租急滌硯烹茶累細君

范楷堂中彥鄆人弱冠遊庠爲孝廉固菴次子年近三十  
好苦吟晚眺用王柏坪原韻莫訝冬郊草木肥榮枯消長  
有天機寒山慘澹形如睡敗葉顛狂勢若飛韻和松濤雙

鶴舞肩挑梅月一僧歸晚來眺覽多幽趣得句渾忘露溼衣

周福海仁聞南川光圃立瑛次子也和圃少與余同學後成進士福海與兄仁聲號春湖能讀父書爲諸生春湖子厚璽亦入泮三人偕嶮生仁恬應秋試迂道過榮多以文藝相質福海書所作詩見示余喜和圃有後也因錄之登凌雲山放歌凌雲嵯峨峩峩峩峩巖斷壁截江立古樹杈枒曲曲蟠佛腳波濤洶湧急捨船次岸入山遊磴道參差轉更幽殘碑斷碣篆疑籀苔蘚半封綠意稠初入潮音洞旋登東坡樓放眼區內小回頭塵世悠俯視岷江波碎滄

疑有蛟龍伏其下仰聽天風鼓舞聲渾似宮商協幽雅是  
時來路雲已封飄飄直欲追仙蹤遠看峨眉嶺雙峙巍然  
遙對凌雲峯興來笑摩大佛頂試問佛能救世無差等不  
然年年江頭看覆舟安見慈航能扶拯畢竟佛力難違大  
死生安危聽自然我乘長風飛破浪扁舟安穩枕流眠世  
間萬事都不計眼前只有烏尤山轉尋蹊徑細搜討泉聲  
四壁流潺潺荒祠謁拜蘇長公彷彿玉局來雲中足踏星  
斗手摩蒼穹胸闊天地目小衡崧儼若仙子遊天臺飄然  
四大御神風又若海客乘槎到蓬島飛騰羽化破洪濛此  
時興會頗超忽遠視夕陽照巖窟蒼然暮色浮四山歸來

古寺鐘磬發江安鄒貞女詩云在山泉常清出山泉恐濁  
不如長在山清光盈汨汨傅氏有五郎聘定鄒貞女方及  
婚娶時郎命忽衰阻哀哀女心傷往弔傅家堂憑棺一長  
痛血淚灑千行謁拜堂上姑願爲傅家孀矢志不他適苦  
節重門閤不必賦柏舟清操自殊俗不必歌黃鶴堅貞美  
如玉上爲郎養親下爲郎抱子養親陳自甘抱子繼宗嗣  
妾存如郎存郎死猶未死堂堂大義陳兩世一身繫獨抱  
歲寒心精誠貫天地吁嗟乎江陽地脉蟠根厚氣正坤維  
重節守鄒氏有女灑冰操貞名自同山不朽有此詩才可

春湖仁聲福海仁聞今秋偕從弟梅生仁恬先後至榮應  
鄉試余謂乾隆丙午君家兄弟叔侄一榜中三人今歲又  
丙午矣企予望之作七律四首以贈春湖乃以光圓詩見  
示開卷見咏岳忠武三十首多不勝載爲錄二首隻手扶  
天願已空惟從青史想遺風兩河屢下英雄淚十載空餘  
血汗功帳外魂歸江月冷關前日鎖陣雲紅天涯過客關  
心甚愁殺秋風古木叢湯陰故里識侯家晉謁猶欣日未  
斜膝下雲雷堪繼父敵中龍虎亦呼爺荒祠月冷行人淚  
古殿春寒舊苑花壁上新詩多感慨一回吟咏一吁嗟又  
楊烈婦云盤江之山風勁烈盤山之泉水清潔我聞烈婦

死節時天欲六月爲飛雪節婦生本西蜀人隨夫入黔心  
和悅歷盡關山風雨寒百年相期死同穴夫忽亡子又幼  
一身嘆孤孑十指自營生活計豪門富貴心不屑忽有狂  
夫狂欲奪節婦節節婦之顏美如玉節婦之心堅似鐵任  
爾掉盡三寸舌此身可殺心不折狂奴強掠至中途哀懷  
難訴常蘊結四顧茫茫天地窄愁雲欲墜山欲裂日光黯  
淡樹色昏萬木悲號風淒切疾聲呼天天不聞輕身投澗  
真勇決疑是綠珠墜高樓血濺魂飛稱奇絕又疑何氏墜  
瑤臺流水聲聲同嗚咽驛卒羣起縛狂奴狂奴伏罪憤堪  
泄更喜 朝廷闢幽光路傍大字樹碑碣世間多少紅顏

婦死如鴻毛真飄瞥君不見盤江之石數點血風雨摧剝  
不能滅

浙江蔡磨洲先生以御史督學四川按試嘉定考古學題  
爲嘉州竹枝辭余適代辦提調擬作十二首試畢檄書川  
扇呈覽及試重慶以列國戰國宮辭命題事舊格新從所  
未有又各擬十首寄呈猥荷獎許過當實不克承特錄以

紀文字因緣嘉州竹枝辭云平羌江水碧琉璃下水船輕

上水遲誰道行遲儂更喜白雲堆裏望峩峩

嘉州正  
對峩峩 杪櫂

樹下淨無埃結伴燒香踏綠苔百里朝山誇父老這回親

見佛光來

嘉州南峩峩山上生杪櫂樹雲  
中放圓光謂之佛光不常見

踏青遊女繡羅



襦雲髻均粘柳葉符纔出瞻我門外路逢人先問小西湖

踏青女貼花勝于鬢謂之柳葉遊人到此日倘佯幾箇如

符瞻我門外有大西湖小西湖

仙幾箇狂有酒有花須盡醉紅雲深處海棠香昔多海棠城內有海

棠灣海棠山 到處山鄉接水鄉由來北客怯炎方勸君銷夏還

須住荔子初紅沁齒涼城北有荔枝灣臨江半是釣人居婦子團

團樂有餘顛顛香蒸雲子飯條條柳貫桃花魚產桃花魚桃開則生

額有紅點嘉州從古擅風流莫怪人輕萬戶侯紅葉滿山

如桃花

江水碧秋來齊上大佛頭唐時僧海通就山鑿大佛像三百尺以鎮三江之衝報賽

迎神唱竹枝竹公溪畔竹王祠插花蠻女清歌罷露冷鵝

啼月上時

一水自夾江來遠郭南流注江曰竹公溪有竹林三郡

秀江山亦愛小

東坡已去放翁來漁人不識書中字結網還登爾雅臺

爾雅

臺在烏尤山正覺寺外傳郭璞注爾雅產墨魚衝山裂岸門龍蛇來看雷奔浪湧

沙鎖水金身三百尺飛空亂洒白蓮花凌雲頂上看冬雪

方響洞邊聽晚風疑是仙妃來月下輕搖環佩玉丁東

方響

洞在城內高標山下靜聽水滴有聲舊名丁東水黃山谷改今名鹽船箇箇似浮鷗四望

關前且暫畱賈客不知離別恨又隨明月下渝州

四望關在州東

高可四望故名江波照妾光如鏡江水無情卻送郎東下荆門千

里隔九峯相對九迴腸

凌雲山在城東一名九頂山亦稱小九疑栽桑種稻自

村村鑿井剪鹽亦帝恩民愛官清官更樂此州有蠓佐芳

樽

蜀地少蠓嘉州獨有列國宮詞云紅顏誤妾入他家脉脉無言臉

暈霞愁煞細腰宮畔柳君王從此愛桃花楚宮別館離宮次

第開秦川如畫映樓臺吹簫未引雲間鳳駢脅英雄入贅

來秦宮芍藥相投笑語狂溱川上已好風光民間那識宮中

貴人夢芳蘭是國香鄭宮臨淄萬戶曉烟生作戲無端惱列

卿跛客先登房內笑誰知一笑幾傾城齊宮結束花裙繡襖

福美人編伍列行行教成一隊胭脂虎娘子軍聲嚇楚疆

吳宮越國烽烟犀甲多黃池盟罷息干戈吳宮花草應如舊

有女含顰喚柰何吳宮隔院風飄帶笑聲登臺喜見體輕盈

難瞞近侍知消息齧臂微聞細語盟魯宮文馬東來氣不驕

韶顏幾輩曳紅綃美人絲管通宵樂那得工夫事早朝魯宮

出宮迴望淚沾衣羞見參差燕燕飛當日黃裳何忍著

藏猶帶舊香歸

衛宮

舉世誰能識鳳麟勞勞車馬困風塵人

言西子遜南子環佩鏘鳴拜聖人

衛宮

戰國宮詞云沅芷澗

蘭種幾叢名花處處待春風君王不忍前魚泣若箇娥眉

敢入宮

楚宮

鄂渚秋風落葉堆襄王朝暮任陽臺鴛鴦媒無信

多山鬼誑說仙雲入夢來

楚宮

一見王孫笑語通經營百計

入秦宮邯鄲鼓瑟人如舊奇貨誰知販鬻工

秦宮

熒熒明鏡

照新妝渭水流脂入地香三十六年秋夜冷可憐無日見

君王

秦宮

武靈雄概亦堪誇代北雲中盡是家趙國佳人顏

似玉晚年偏性愛吳娃

趙宮

修容媚主貌如仙列屋閒居各

門妍聞道無鹽新受寵一時含淚卸花鈿齊秦人巧術亦

多般欲試靈心取笑嬾賴有深宮王后在外庭無計解連

環齊丁丁宮漏月黃昏臥室何人敢到門共說如姬閉大

義竊符先報信陵恩魏宮中瓦震劇心憂十萬秦兵戰未

休共恨平原無上客高樓空斬美人頭趙馬角烏頭感上

天深宮銜恨淚潸然纖纖玉手甘酬客劒術無成最可憐

燕回札評云宮詞用意極新選詞極雅琢句極雋其一筆

運兩典處尤以一縷清思貫串而就靈襟獨抱妙緒紛來

才子騷人一齊頰首竹枝詞後不圖又讀此篇奚止橫掃

五千人耶余何能然特宗匠過譽誘之使至於道耳先生

爲安岳倉場侍郎王蓮洲炳瀛門下士侍郎歿未久家計蕭疎先生以金爲置產業古人之誼也

溫江王遲士侃爲余課孫肇元南川周嶠生仁恬課余使紹德遲士工古文辭嶠生工四六前已各載其詩矣嶠生同重慶應試爲學使蔡公賞拔以母病不能來館葉小珩恩培浙江龍游人善畫美人亦能詩周寶傳爲之介紹來榮卽代嶠生教讀交相善也遲士之子誌從其姊文貞受經年十五紹德肇元年皆十四今中秋節三人置酒果登署中土山賞月天陰不見肇元約共聯句余聞之喜詩皆不知用意作七絕示之云風動琅玕響畫簷清光入盼碧

峯尖白頭應惹姮娥笑桂殿深沈不捲簾

此子謂今夜仙娥

會廣寒重重羅幕怕人看他年汝輩梯雲上攀桂休呼白

玉盤

此首勉之

越日乃各呈詩題爲賦遠遊言志落葉撲人衣

百草深秋洞茅亭清溪側白雲空中飄是時日沈彩行人

語聲驚一路山嶽崎青松挂猿猱泉流古石上寒氣貫雲

霄青山蒼翠千萬里茲景幽深真可喜人生在世如煙塵

何必憂怨傷吾神

王誌

竹葉晚蕭蕭秋深草木凋意欲訪名

地路遠水迢迢山川迢遞不言遠欲遊岳壑秋已晚瀛洲

天姥皆名勝冬來雪壓松偃蹇天地之大無不有放懷願

與古人偶

元肇

皎皎明月光穿簾入畫堂青燐斜照處誤看

作秋霜聳首凭欄望蒼天淨無穢月輪籠修竹點點如金  
碎此紹德望月詩也又對月飲酒紹德詩云春景撩人夜  
未眠獨自散步畫堂前踏碎花影石徑微西軒月色今宵  
妍人生難逢花月夜獨酌清酒倚花榭月光對我我對月  
舉杯欲邀姮娥下楊柳風過嫩涼生四望星稀月更明夜  
深衣濕因露重紫薇花上月三更賞玩不知坐時久杯盡  
壺傾空翹首我歌月且聽我醉月不走嗟呼春宵一刻價  
千金莫使酒罇空自斟一夜風景賞不盡月到暗中移花  
陰肇元詩云不聞蟲聲唧唧但聞松風夜帶寒不見烏雀  
南飛但見碧空月色闌月下獨酌人心爽光照脩竹喜欲



看我歌月燦爛我舞影凌亂夜深花影上窗遲宿鳥一聲  
樹上喚共邀明月作酒仙何如當年李青蓮瓊樓玉宇今  
何在紅霞一抹空中碎玉盤西墜白露微獨坐無言星宿  
稀不信昔年明月夜玉人歌舞未曾歸王誌詩云攜來斗  
酒泛兕觥誰言對月月無情寒光在酒杯在手酒酣喝月  
向東明深宵天氣涼如水耿耿銀河向天橫銀燭爭輝兩  
不語騰歡高唱徧流聲浮生世上宜如此攀桂直到蟾窟  
裏桃李數枝衣上影雲斂青天無涯淚隔煙何處發清歌  
仰顧空中月舒波霓裳舞罷素娥笑問我今夕樂如何樂  
如何今月將墜問月無言月亦醉長嘯一聲斗柄斜驚破

孤山老鶴睡孺子不足言詩附錄以示鼓舞使異日進步  
回視匆匆狗做帚有此一段公案也